

TE EVANELIA A IOANE.

PENE I.

To te Logo riro anga mai ei tangata, te tuatua a Joane ia Jesu, e te iki angaia o Joane ma.

I VAI ana te Logo i muatangana, i te Atua ra oki te Logo, e ko te Atua oki te Logo.

2 I te Atua ra oki aia i muatangana.

3 Nana i anga te au mea katoatoa, kare ua aia i ngere i tetai mea i angaia ra.

4 Tei roto iaia te ora, e taua ora ra, to te tangata ia marama.

5 I kaka mai ana te marama ki te poiri, kare râ to te poiri i ariki adu.

6 ¶ I tonokia mai tetai tangata mei ko mai i te Atua ra, ko Ioane te ingoa.

7 I aere mai taua tangata ra ei kite, ei akakite i taua marama ra, kia akarongo te tangata katoatoa iaia.

8 Kare ra aia i taua marama ra, i aere mai ra ei akakite i taua marama ra.

9 Koia te marama mou, ko te akamarama mai i te tangata katoa i tona aere anga mai ki te ao nei.

10 ¶ I te ao nei aia, e nana i anga teiane ai; kare râ to te ao i kite adu iaia.

11 I aere mainei aia i ona tikai, kare ra tona iti tangata tikai i kite adu iaia.

12 Te aronga katoa râ i kite adu iaia, i te akarongo

anga i tona ingoa, o maira aia i te meitaki ia ratou ei tamariki na te Atua.

13 Te aronga kare to te toto i anau ei ra, kare oki to te anoano o te kopapa, kare oki to te anoano o te tangata, no te Atua ra.

14 I riro mainei te Logo ei tangata, e kua buâkapa mai ki o matou nei, (kua kite matou i tona tabu, mai te tabu e tau i te Tamaidi anau tai a te Medua ra) kua ki i te meitaki e te tuatua mou.

15 ¶ Nona ta Ioane i akakite mai, iaia i kapiki ra e, Koia oki teia taku i karanga ra, Ko te aere mai i muringao iaku nei, ko mua oki aia iaku.

16 Kua rauka ia tatou katoa te meitaki, e tau i tona meitaki, no tona ra ki.

17 Na Mose oki i duku mai te ture, kareka te meitaki e te tuatua mou, na Jesu Mesia ia.

18 Kare ua e tangata i kite i te Atua; ko te Tamaidi anau tai, ki runga i te umauma o te Medua ra, koia tei akakite mai iaia.

19 ¶ Teia ta Joane tuatua, i te tono anga mai a te ngati Juda i te aronga taunga ra, e te ngati Levi no Jerusalema mai, e ka ui kiaia, Koai koe?

20 Kua aaki adura aia, kare rava i uuna, aaki ua adura, Kare au te Mesia.

21 Kua nako maira ratou kiaia, Koai oki koe? Ko Elia ainei? Kua karanga adura aia, Kare au. Ko taua peropheta

ra ainei koe? Kua karanga adura aia, Kare ua.

22 Kua karanga maira ratou kiaia, Koai oki koe? ei tuatua anga na matou ki te aronga i tonon mai ia matou: Eaa ua taau tuatua iakoe uaorai?

23 Kua karanga adura aia, Ko te reo au no tetai e kapiki aere ki te medebara ra e, "Ka akatikaua i te mataara no te Atua, ko te karangaia mai e Isaia peropheta ra.

24 No te au Pharisea taua aronga i tonokia maira.

25 Kua ui maira ratou kiaia, Eaa oki koe e bapetizo ei, kare koe te Mesia, kare oki Elia, kare oki i taua peropheta ra?

26 Kua karanga adurā Joane, I bapetizo au ki te vai, te tu ua nei rā tetai i roto i kotou, kare kotou i kite iaia.

27 Koia teia, i miringao aia iaku i te aere anga, mai kua riro aia ki mua iaku, kare ia e tau iaku kia tatara i te tapeka i tona tamaka.

28 Tei Betania Ioridana i te tuatua angaia taua tuatua nei, i te bapetizo anga a Joane ra.

29 ¶ E ao akera, kite adura a Joane ia Jesu i te aere anga mai kiaia ra, e kua na ko akera, Ka akara na i te Arenio a te Atua, ko tei apai ke adu i te ara a to te ao.

30 Koia teia taku i karanga ra e, Te aere mai nei tetai tangata i miringao iaku nei, e kua riro aia i mua iaku; ko mua rai oki aia iaku.

31 Kareka au, kare au e kite iaia; kia kitea ra aia e to Ise-raela i aere mai ei au, e bapetizo ki te vai nei.

32 Kua akakite adurā oki a Joane, na ko adura, akara adura au i te Vaerua i te eke anga mai mei te rangi mai, mei te peritetera ra te tu, e kua to ora ki runga iaia.

33 E kore ra au e kite iaia, auraka tei tonon mai iaku e bapetizo ki te vai nei, i karanga mai ki aku nei e, Ko taau e akara i te Vaerua i te eke anga mai, e te noo anga ki runga iaia, koia ia, ko te ka bapetizo ia ki te Vaerua Meitaki.

34 Kite adura oki au, e teia taku tuatua, ko te Tamaidi aia na te Atua.

35 E ao akera, te tu ua akera a Joane e tokorua buke pipi ana ra;

36 E kite akera aia ia Jesu i te aere anga mai na reira, kua na ko akera, Ka akara na i te Arenio a te Atua.

37 E kite akera nga pipi i taua tuatua ra, kua aru adura raua ia Jesu.

38 Kua anga maira Jesu ki miri, kite maira ia raua i te aru anga, kua karanga maira kia raua, Eaa ta korua e kimi nei; kua karanga adura raua ki aia, E Rabi, (koia oki te karangaia nei e, e te Oromedua kia kiritiia ra,) E noo koe ki ea?

39 Kua karanga maira aia kia raua, Ka aere mai ka akara. Aere adura raua e kite adura i tona noo anga, e noo adura ki ona i taua rā ra: kua tae oki te ngauru o te ora.

40 E tetai o aua buke tangata tokorua i akarongo i te tuatua a Joane ra, ko tei aru adu ia Jesu ra, Ko Anederea

ia, te taeake o Simona Petero ra.

41 E aravei adura aia i mua i tona uaorai tuakana ia Simona kua tuatua adura aia kiaia, Kua kitea ia maua te Mesia, (koia oki te Christ kia kiritiia ra.)

42 Kua arataki maira aia iaia kia Jesu ra. E kia akara akera Jesu iaia ra, na ko adura, Ko Simona koe, ko te tamaidi a Jona; ka tapaia koe ia Kepha, koia oki Petero.

43 ¶ E ao akera, kua manako roa akerā Jesu, ka ere ki Galilea, e kua aravei akera ia Philipa, kua karanga adura kiaia, Ka aru mai iaku.

44 No Betesaida Philipa, no te oire o Anederea e Petero.

45 E aravei akera oki a Philipa ia Natanaela, kua karanga adura kiaia, Kua kitea e matou i ta Mose i tata ki roto i te ture ra, e ta te au peropheta ra, ko Jesu i Nazareta, e tamaidi na Josepha.

46 Kua karanga maira a Natanaela kiaia, E meitaki ainei to Nazareta mai? kua karanga adurā Philipa kiaia, Ka aere mai ka akara.

47 Kua akara adura Jesu ia Natanaela i te aere anga mai kiaia ra, kua tuatua ora kiaia, Ka akarā na i te ngati Iseraela tikai, kare ua e pikikaa o roto iaia.

48 Kua karanga maira a Natanaela kiaia, Eaa koe i kite ei iaku? Kua tuatua adura Jesu, Akara adura au iakoe ki raro ake i te suke, ou Philipa i karanga adu ei kia koe.

49 Kua karanga maira Na-

tanaela kiaia, E Rabi, ko te Tamaidi koe a te Atua, ko te Ariki koe o Iseraela.

50 Kua tuatua adurā Jesu kiaia, na ko adura, No te mea i kāranga adu au kia koe na e, te akara adura au iakoe ki raro ake i te suke ra i akarongo ei koe: mea ngiti tena i taau e ka kite a muri nei.

51 Kua tuatua adura aia, Amene, amene, e tuatua adu au kia kotou. Teia kotou ka kite i te rangi i te mavete anga, e te au angela a te Atua i te kake anga ki runga, e i te eke anga mai ki runga i te Tamaidi a te tangata nei.

PENE II.

To Jesu akariro anga i te vai ei wina e te uri anga te aronga oko ra ki vao i te iero ra.

E PO toru akera, e akaipoipo anga tei Kana i Galileara, tei reira katoa te medua vaine no Jesu ra.

2 E karangaia mairā Jesu e te aronga pipi ana, ka aere katoa i taua akaipoipo anga ra.

3 E pou akera te wina, kua karanga maira te medua vaine o Jesu kiaia, Kare a ratou wina.

4 Kua tuatua adura Jesu kiaia, Eaa taaukiaku nei, e Maine; kare i tae ki toku ora.

5 Kua karanga adura te medua vaine ki te au tavini, Ko tana e akaue mai kia kotou, ka akapera kotou.

6 Te vai ua ra nga ue vai toka e ono, taki rua bato te ka o i te ue okotai, e taki toru

oki, i vaioia ki reira no te peu i te tama anga a te ngati Juda.

7 Kua tuatua adurā Jesu kia ratou, Ka akaki ana te arongā ue ki te vai. Kua akaki ora ratou e tae ua akera ki te nia.

8 Kua karanga adura aia kia ratou, Ka akatae ana, apai adu ei ki te kavana o te oroa nei. Kua apai adura oki ratou.

9 E kia tongi akera te kavana o te oroa i taua vai i akariroia ei wina ra, no te mea kare aia i kite i te rauka anga mai, (kareka te au tavini i akatae mai i taua vai ra, kua kite ia,) kua tuatua adura te kavana ki taua tane ou ra,

10 Ko te wina meitaki ta te tangata katoa e duku mai ki mua, e kia inu maata te tangata, e muringao te mea kino ake; kua vaio râ koe te wina meitaki, e i teiane i apai na mai ei.

11 Tei Kana i Galilea te rave nga a Jesu i teiane semeio mua, i te akakite anga i tona inuini; e kua akarongo te au pipi kiaia.

12 ¶ E muri akera i tei reira, aere adura aia ki Kapere-rena, aia ma tona au taeake, tona medua vaine, e tana au pipi, kare ra i maata uato ratou râ i reira.

13 Te vaiata ua ra te pasa a te ngati Juda ra, aere adurā Jesu ki Jerusalema.

14 E kite adura aia i te aronga e oko i te bovi, e te mamoe, e te peritetera e te aronga oko moni i te noo anga ki roto i te iero ra;

15 Kua anga ora aia i te taura rikiriki ei papa, e kua tuvaru adura ia ratou katoa ki

vao mai i te iero ra, e te aronga mamoe, e te bovi, e riringi adura te moni a te aronga oko moni ra; e akatauri adura i ta ratou au papa.

16 E karanga adura ki te aronga i oko i te peritetera ra, Apai kê adu i tena au apinga. Eiaa e akariro i te are o taku Medua ra, ei are oko anga taonga.

17 Kua manako akera te au pipi i te tuatua i tataia ra, "Kua pou roa au i te maroiroi i toou are."

18 ¶ Kua karanga maira te ngati Juda kiaia, Eaa taau akairo e akakite mai, i akapera mai ei koe?

19 Kua tuatua adurā Jesu, na ko adura, Ka vavai ua na i teiane nao, e kia po toru ake, kua tu akaou ia iaku.

20 Kua karanga maira te ngati Juda, Eaa ngauru mano te mataiti i te akatu anga i teiane nao; e ka tu akaou iakoe i te po toru?

21 Ko tona kopapa te nao tana e karanga ra.

22 E kia tu akaou mai aia mei te mate maira, kua manako akera tana au pipi e, i tuatua na oki aia i taua tuatua nei; kite akera ratou i te tuatua i tataia ra, e te tuatua i karangaia e Jesu ra.

23 E iaia i noo i Jerusalema i te oroa i te pasa ra, manganui te tangata i akarongo iaia i reira, no te au semeio i kitea e ratou tana i rave ra.

24 Kare uâ ra Jesu i tuturi adu kia ratou, no te mea, kua kite aia ia ratou katoatoa.

25 E kore oki aia e akakiteia mai e tetai kê i te tu o

te tangata, kua kite aia i to roto i te tangata.

PENE III.

Te tuatua a Jesu kia Nikodemō i te anau akaou agna, e to te Atua aroa maata, e to Jesu bapetizo angaia.

TE noo ra tetai Pharisea ko Nikodemō te ingoa, e kavanna no te ngati Juda.

2 Ko tei aere mai i te po kia Jesu ra, e kua tuatua maira kiaia, E Rabi, kua kite matou e, e oromedua koe mei ko mai i te Atua ra; kare oki teianeī au semeio taau e rave nei e tika i te tangata, auraka te Atua katoa ra.

3 Kua karanga adurā Jesu, na ko adura kiaia, Amene, amene, e tuatua adu au kia koe, Kia kore te tangata e anau akaou ra; e kore aia e kite i te basileia o te Atua ra.

4 Kua tuatua maira Nikodemō kiaia, Eaa ua te tangata medua e anau ei? ka o akaou ainei ki roto i te kobu o tona medua vaine, ka anau mai ei?

5 Kua karanga adurā Jesu, Amene, amene, e karanga adu au kia koe, Kia kore te tangata e anau ki te vai, e te Vaerua, e kore aia e o i te basileia o te Atua.

6 Ko ta te kopapa e anau nei, e kopapa ia, ta te Vaerua e anau ra, e vaerua ia.

7 Eiaa koe e poitirere ua, koau i karanga e, kia anau akaou kotou e tika'i.

8 Te arara ua nei te matangi i tana ngai e anoano ra, te kite ra koe i tona aruru, kare ra koe

i kite i te vai no reira mai aia ra, e te ngai e aereia du e ia ra; koia tika oki te tangata katoa ta te Vaerua e anau ra.

9 Kua tuatua maira a Nikodemō kiaia, Eaa ua ia au mea e tika'i?

10 Kua karanga adurā Jesu kiaia, Ko te oromedua oki koe a to Iseraela, e kare koe i kite i teianeī tuatua?

11 Amene, amene, e tuatua adu au kia koe, Ko ta matou i kite ra, ta matou e tuatua nei, e ta matou i akara ra, ta matou e akakite nei, e kore rā kotou e ariki mai i ta matou tuatua.

12 I tuatua na au kia kotou i te tuatua no teianeī ao, e kare kotou i kite, eaa ua kotou e kite ei kia tuatua adu au kia kotou i te tuatua o te rangi?

13 Kare rava e tangata i tae ki runga i te rangi, auraka ko tei aere mai ki raro mei runga mai i te rangi ra, ko te Tamaidi a te tangata i runga i te rangi ra.

14 Mei ia Mose i akateitei i te ophi i te medebara ra, koia katoa te Tamaidi a te tangata ra, ka akateitei katoaia ia.

15 Kia kore e mate te tangata e akarongo iaia, kia rauka ra te ora mutu kore ra.

16 ¶ I aroa mai te Atua i to te ao nei, kua tae rava ki te oronga anga mai i tana Tamaidi anau tai, kia kore e mate te akarongo iaia kia rauka ra te ora mutu kore.

17 Kare oki te Atua i tono mai i tana Tamaidi ki te ao nei e akaapa mai i to te ao, kia ora rā to te ao iaia.

18 ¶ Te akarongo iaia ra,

e kore aia e akaapaia, te kore e akarongo ra, kua akaapa takereia na ia, i te mea kare aia i akarongo i te ingoa o te Tamaidi anau tai a te Atua ra.

19 Teia taua akaapa ra, ko te marama, kua tae mai ki te ao nei, e anoano akenei te tangata i te piri, kare te marama, no te mea te kino ua ra ta ratou tuatua.

20 Ko te tabu i te tuatua kino ra, kare aia e anoano i te marama, kare oki aia e aere mai ki te marama, ko te kitea aea tana tuatua.

21 Ko te akono i te tuatua mou ra, ka tae mai ia ki te marama kia kitea meitakiia e, te tau ra tana tuatua ki te Atua.

22 ¶ E muri akera, aere adurā Jesu ma tana au pipi ki tetai enua i Judea, noo adura i reira ma ratou katoa, e bapetizo ora i te tangata.

23 Te bapetizo katoa ra oki a Joane i Aino, i vaitata ua i Salema, no te mea e manganui to reira vai, e kua aere maira te tangata, e bapetizoia ora.

24 Kare râ Joane i uriia ki roto i te tapeka anga.

25 ¶ Kua maro ora te au pipi a Joane e te ngati Juda i te tama anga.

26 Aere adura ratou kia Joane ra, e kua karanga adura kiaia, E Rabi, te tangata i noo korua i te pae i Joridana ra, ko taau i akapaa ra, i na! te bapetizo ua ra aia, e te aere ua maira te tangata katoatoa kiaia.

27 Kua karanga maira a Joane, Kare o te tangata mana e rauka, mari râ ko tei orongaia mai no te rangi ra.

28 Ko kotou ua orai tei kite iaku, e kua tuatua adu au e, Kare au te Mesia, i tonokia mai au e na mua iaia,

29 Ko te tane ou ra, te tangata nana te vaine, ko te oa ra o taua tane ou ra, ko te noo ua i te pae i te akarongo anga kiaia ra, e umere maata tona i te reo o te tane ou ra, e teiane kua tika rava toku umere anga.

30 Ka tubu aia i te maata anga, ka oki ra au i te mea ngiti anga.

31 Ko te aere mai mei runga ra, ko te maata ia; ko to te repo ra, no te repo ia, e no te repo oki tana tuatua. Ko to runga mai i te rangi ra, ko te maata ua du ia.

32 Ko tana i akara ra, ko tana i akarongo ra, ko tana rai e tuatua nei, kare râ e tangata e ariki mai i tana tuatua.

33 Ko tei ariki mai i tana tuatua, kua karanga ia e, e tuatua mou ta te Atua.

34 Ko ta te Atua i tonu maira, ko ta te Atua rai tuatua tana e tuatua ra, kare oki te Atua i oronga rikiriki ua mai i te Vaerua nona.

35 Te akaperepere nei te Medua ki te Tamaidi ra, e kua oronga ua mai te au mea katoa ki tona rima.

36 Ko te akarongo i te Tamaidi ra, e ora mutu kore tona, e tei kore e akarongo i te Tamaidi ra, kare aia e kite i te ora, te vai ra ia te riri o te Atua ki runga iaia.

PENE IV.

No te tuatua anga a Jesu raua ma te vaine Samaria ra, e te tuatua i te kai ora ra.

E KITE akerā Jesu, e kua akakiteia i te au Pharisea e, e maata tana i akariro ei pipi, e tana e bapetizo ra i ta Joane.

2 (Kare rā Jesu tikai i bapetizo, na tana au pipi rā.)

3 Akaruke ora aia i Judea, oki akaou adura ki Galilea.

4 E e na Samaria aia te aere e tika'i.

5 E tae adura aia ki tetai oire i Samaria, ko Sikara te ingoa, tei vaitata ra ki te kotingā kainga ta Jakoba i oronga du no tana tamaidi no Josepha.

6 Tei reira te ruā vai a Jakoba ra; e roiroi akera i te aerenga, noo ua ora aia ki te pae o taua ruā vai ra, kua tae ki te ono o te ora ra.

7 Kua aere maira tetai vaine Samaria e uti i te vai, kua karanga adurā Jesu kiaia, ka omai ana e inu.

8 Kua topa adura oki tana au pipi ki roto i te oire e oko i te kai.

9 Kua karanga maira taua vaine Samaria ra kiaia, Eaa ua koe te ngati Juda na i pati mai ei iaku i te vaine Samaria nei i te vai? (e kore te ngati Juda e tau meitaki i to Samaria.)

10 Kua tuatua adurā Jesu kiaia, Naringa koe i kite ana i ta te Atua i oronga maira, e tei karanga adu kia koe na e,

Ka omai na e inu, kua pati mai ia koe iaia, e kua oronga aia i te vai ora naau.

11 Kua karanga maira taua vaine ra kiaia, Kare aau bapetete, e rua oonu teia, eiea taau vai ora e rauka'i.

12 E maata ainei koe ia Jakoba i to matou medua, ko tei oronga mai na matou i teiane ruā vai, e kua inu aia uaorai, e tana au tamariki, e te au puaka.

13 Kua karanga adura Jesu kiaia, Ko te inu i tenana vai, ka kaki akaou ia.

14 Kareka te ka inu i te vai e orongaia du e au nei, kare aia e kaki akaou, ka riro rā taua vai e orongaia du e au nana ra, ei vai pupui ua ki roto iaia, e tika i te pupui anga, e ka tae ua du ki te ora mutu kore ra.

15 Kua karanga maira taua vaine ra kiaia, E te Atua, ka omai ana taua vai ra naku, kia kore au e kaki akaou, kia kore oki e aere mai i konei e uti.

16 Kua tuatua adurā Jesu kiaia, Ka aere ka tiki i to tane, ka oki mai ei.

17 Kua karanga maira taua vaine ra, na ko maira, Kare aku tane; kua tuatua adurā Jesu, E tuatua tika taau i karanga maira e, Kare aku tane.

18 Ka tokorima akenei oki aau tane; e tenana taau e moe ana, kare te tane naau. E tuatua mou taau e tuatua mainei.

19 Kua karanga mairai taua vaine ra kiaia, E te Atua, e pepheta koe, te kite nei au.

20 I akamori ana oki to matou ui medua ki runga i teiane

maunga ; e te karanga na kotou, tei Jerusalema te akamori anga e tika'i kia akamori te tangata.

21 Kua tuatua adurā Jesu kiaia, Ka akarongo mei ana e maine, kua vaitata te ora e kore kotou e tae mai ei ki teiane maunga, e, e kore oki e aere ki Jerusalema e akamori ei te Medua.

22 Kare kotou i kite i ta kotou e akamori nei, kua kite matou i ta matou e akamori nei, no te ngati Juda mai te ora.

23 Kua vaitata, e teiane oki taua ora ra, e akamori ei i te medua te aronga akamori tika ra, ma te Vaerua e te tuatua mou : ko te tu ia o te tangata akamori ta te Medua e ano ano ra.

24 E Vaerua te Atua, e te aronga e akamori iaia ra, kia akamori ma te Vaerua e te tuatua mou ra e tika'i.

25 Kua tuatua mairai taua vaine ra kiaia, kua kite au, e te aere maira te Mesia, (ko Christ ra ia) e kia riro mai aia ra, nana e akakite mai kia matou i te au tuatua ravarai.

26 Kua karanga adurā Jesu kiaia. Koau ia e tuatua adu kia koe na.

27 I reira te tae anga mai o tana au pipi, va ua akera ratou, aia i tuatua adu ki taua vaine ra : kare ua du ra tetai i karanga du e, Eaa taau e ui ana, eaa koe i tuatua adu ki kiaia ?

28 Vaio ua ora taua vaine ra i tana āriki vai, aere adura ki roto i te oire, e karanga adura ki te tangata.

29 Aere mai, ka aere, ka akara i te tangata i akakite mai kiaku i taku au peu katoa nei, Kare ainei tera ake te Mesia ?

30 Aere adura ratou kiaia ra, no roto mai i te oire.

31 ¶ Kua tuatua na tana au pipi kiaia, kua na ko ana, E Rabi, ka kai.

32 Kua karanga maira aia kia ratou, E kai taku e ka kai, kare ua kotou i kite.

33 Kua tuatua ora te aronga pipi ia ratou uaorai, I apai mai ainei te tangata i te kai nana ?

34 Kua tuatua maira Jesu kia ratou, Teia taku kai, ko te akono i tona anoano, to tei tono mai iaku ra, ma te akaoti i tana angaanga.

35 Kare kotou i karanga e, e a marama toe e mou ei ? e karanga adu au kia kotou, ka akateitei i to kotou mata, ka akara i te au koro ra, kua teatea ia e teiane kua mou.

36 Te tangata e kokoti ra, e utunga tana, e kua akabutu i te meitaki no te ora mutu kore ; kia rekaerka kapipiti, ko te rûrû e ko te kokoti.

37 Kua tubu akenei te manganu tuatua ra, Na tetai i rûrû, e na tetai kê i kokoti.

38 E tono au ia kotou ei kokoti i tei kore i angaia e kotou na ; na e tai kê i angaanga e te akao ua du nei kotou ki roto i ta ratou angaanga.

39 ¶ E manganui maira te tangata no taua oire i Samaria ra i akarongo kiaia, no te tuatua a taua vaine i karanga e, Kua akakite mai kiaku i te peu tini ravarai naku ra.

40 E kia riro mai to Samaria kiaia ra, kua tabu maira ratou iaia e noo kio ratou ra, kua noo iora aia ki reira e po rua.

41 Manganui adura tei akarongo i tana uaorai tuatua.

42 Kua tuatua akera ki taua vaine ra, Kare no te tuatua aau i karanga maira i akarongo du ei matou, kite ua akenei matou iaia uaorai; kua kite adura matou e, ko te ora mou teia o to te ao, ko te Mesia.

43 ¶ E po rua akera, aere adura aia i Galilea, Kare rā i Nazereta.

44 I tuatua na aia orai e, e kore te peropheta e rekaia mai e tona uaorai enua tikai.

45 E tae adura aia ki Galilea, kite meitaki maira to Galilea iaia, i akara na oki ratou i te ravenga tini tana i rave i te oroa i Jerusalema ra, i reira katoa ratou i taua oroa ra,

46 E tae akaou adura oki a Jesu ki Kana i Galilea, i te ngai tana i akariro i te vai ei wina ra. Te mate ra te tamaidi a tetai tangata mana kio te ariki ra i te maki i Kaperena.

47 Kite akera aia e kua tae mai a Jesu ki Galilea mei Judea mai, aere adura aia kiaia ra, tuatua meitaki adura kiaia, kia aere mai aia e akaora i tana tamaidi, kua waitata oki aia i te mate.

48 Kua karanga mairā Jesu kiaia, Kia kore kotou e kite i te semeio ma te piri ra, kare ua kotou e akarongo.

49 Kua tuatua adura taua tangata mana kio te ariki ra, Aere mai ka aere, ka mate taku tamaidi.

50 Kua karanga mairā Jesu kiaia, Ka aere ki toou kainga, kua ora taua tamaidi. Akarongo ua adura taua tangata mana kio te ariki ra i te tuatua a Jesu i karanga maira, aere adura ki te kainga.

51 E te oki adura aia ra, kua aravei maira tona au tavini iaia, kua karanga maira, na ko maira, Kua ora to tamaidi.

52 Kua ui adura aia ia ratou i te ora i aamaru mai ei, kua tuatua maira ratou kiaia, I nana tei te itu o te ora i peke ei te vera.

53 Kua manako akera te medua e, ko te ora mou rā ia i tuatua mai ei a Jesu e, kua ora to tamaidi. Akarongo adura aia e tona kobu tangata katoa.

54 Ko te rua ia i ta Jesu semeio iaia i oki mai ki Galilea no Judea mai i rave ei.

PENE V.

No te tangata makimaki i aka-oraia i Beteseda ra, e te tuatua a Jesu iaia uaorai e ko te Mesia aia.

E MURI akera, e oroa ta te ngati Juda ra, e aere adurā Jesu ki Jerusalema.

2 Tei Jerusalema tetai vai pai, ko Beteseda te ingoa i te tuatua Ebera, tei te pae uaorai i te ngutupa mamoe; e rima are tamaru i tauâ vai ra.

3 E manganui te makimaki i te moe anga ki roto, te matapo, te pirikoki, te ngungu, te tatari ra i te ngarebu anga i taua vai ra.

4 Ka eke mai oki te angela ki raro i te vai i tona du rā,

e akangarebu i tauā vai ra, e te tangata i riro ana ki raro i te vai kia oti te akangarebu angaia ra, kua ora ia i tona maki i mate ra.

5 E tei reira tetai tangata, e toru ngauru mavāru ona mataiti i te mate anga i te maki.

6 E kia akara akerā Jesu iaia i te moe ua anga, kua karanga adura kiaia, Te anoano na koe i te ora? Kua kite takere ana aia e, e mate anga roa tona.

7 Kua karanga maira taua tangata makimaki ra, E te Atua, kare ua e tangata i te duku iaku ki raro i te vai, kia ngarebu te vai ra; te aere adura au, kua riro adura tetai na mua iaku.

8 Kua tuatua adurā Jesu kiaia, Ka tu, ka rave i toou roi ka aere.

9 Ora takiri akera taua tangata ra i reira ra, kua rave akera i tona roi, aere adura; e sabati taua rā ra.

10 ¶ Kua tuatua maira te ngati Juda i taua tangata i akaoraia ra, E sabati teia, kare e tau i te ture kia apai koe i toou roi.

11 Kua karanga adura aia, Na tei akaora mai iaku i tuatua mai kiaku e, Ka rave i toou roi ka aere.

12 Kua ui maira ratou kiaia, Koai ia tangata i karanga mai kiakoe e, Ka rave i toou roi ka aere?

13 Kare ua ra taua tangata i akaoraia ra i kite iaia, ngaro kē adurā Jesu; manganui te tangata tei taua ngai ra.

14 E muri akera kite adurā Jesu iaia ki roto i te iero, kua karanga adura iaia, I na, kua ora

koe, eiaa e ara akaou, ka rokoia aea koe e te kino maata ua du.

15 Aere adura taua tangata ra, akakite adura ki te ngati Juda e, ko Jesu tei akaora iaia.

16 Kua takinga kino maira te ngati Juda ia Jesu, i umuumu maira iaia e ta, koia i rave i te sabati i taua mea ra.

17 ¶ Kua karanga adurā Jesu kia ratou, Te angaanga ua nei rai toku Medua, ka angaanga katoa oki au.

18 Kua maata rava maira to ratou umuumu iaia e ta, koia i akaapa i te sabati, kare ra no tei reira anake ua, koia katoa ra i akaaite iaia uaorai ki te Atua, koia i karanga e, ko te Atua tona Medua tikai.

19 Kua karanga adurā Jesu kia ratou, na ko adura, Amene, amene, e tuatua adu au kia kotou, Kare e tika ta te Tamaidi kia rave aia anake uaorai, ko tana rā i kite i te Medua i te rave anga; ko te au mea katoa tana e rave ra, koia katoa ta te Tamaidi e rave.

20 E akaperepere rai oki te Medua i te Tamaidi, e akakite mai rai oki kiaia i te au mea katoa tana tikai e rave ra, e mea maata adu rai tana e akakite mai kiaia i teia, kia uniere kotou.

21 Mei te Medua oki e akaora i tei mate ra, e akatu mai ia ratou ki runga, e akaora katoa oki te Tamaidi i tana e anoano ra.

22 Kare rava oki a te Medua tangata e akava ra, kua duku uaia mai te akava i te Tamaidi.

23 Kia akangateitei katoa te

tangata i te Tamaidi mai ta ratou e akangateitei i te Medua ra. E te kore e akangateitei i te Tamaidi ra, kare ia i akangateitei i te Medua i tei tono mai iaia ra.

24 Amene, amene, e karanga adu au kia kotou, Ko te kite i taku tuatua e kua akarongo iaia i tei tono mai iaku nei, e ora mutu kore tona, kare aia e akapaia, mei te mate mai aia, e tei te ora adura.

25 Amene, amene, e tuatua adu au kia kotou, kua vaitata e teiane rai te ora e akarongo ei tei mate i te reo o te Tamaidi a te Atua, e te akarongo ra ka ora ia.

26 Mei te Medua ra e ora tona tei roto iaia uaorai, kua oronga mai oki aia i to te Tamaidi, ei ora katoa tona i roto iaia orai.

27 E kua orongaia mai oki te mana kiaia kia akava ra, no te mea e Tamaidi aia na te tangata.

28 Auraka e poitirere ua i tei reira; te vaitata mainei oki te ora e akarongo ei te aronga katoa tei roto i te rua i tona reo, e kua aere mai ki vao.

29 E te aronga i tabu ana i te tuatua meitaki ra, ka tu mai ia ki runga e rave du i te ora; e te aronga oki i tabu ana i te tuatua kino ra, ka tu mai ki runga e rave du i te mate.

30 Kare ua e mea e tika iaku anake ra kia rave; te akatau nei au i taku e akarongo nei, e tuatua tika oki taku; kare au i kimi i toku uaorai anoano, ko te anoano ra o te Medua ko tei tono mai iaku nei.

31 ¶ Koau anake ra, akatika ua'i iaku uaorai, kare ia taku akatika anga e akonoia.

32 Ko tetai kē te akatika mai kiaku, kua kite oki au kia akonoia tana e akatika mai iaku ra e tika 'i.

33 Kotou uaorai oki tei tono i te karere kia Joane ra, e kua akakite mai aia i te tuatua mou.

34 Kare ra au e tika i ta te tangata akatika anga mai; kia ora ra kotou i karanga du ei au i teiane tuatua.

35 Ko taua lamepa mura ra aia e te kakā; umere poto ua adura kotou i tona marama.

36 ¶ Akatika maata ua ra taku i ta Joane, ko te angaanga tini oki a te Medua i omai naku e rave ra, ko taua angaanga tini taku e rave nei, ko te akatika mai iaku nei e, na te Medua au i tono mai.

37 Ko te Medua oki i tono mai iaku nei, kua akatika mai aia uaorai iaku nei. Kare kotou i kite i tona reo e tona tu.

38 E kua ngaro aina ia kotou tana i karanga ra, i kore ei kotou i akarongo i tana i tona mai.

39 ¶ Te kimi nei kotou i te tuatua i tataia ra, no te mea te manako ra kotou, ka rauka te ora mutu kore i reira. Ko te akakite ia iaku taua au tuatua ra.

40 Kare ra kotou e aere mai kiaku nei i te ora oki no kotou.

41 Kare au i anoano i ta te tangata akameitaki.

42 Kua kite ra au ia kotou, e kare rava o kotou anoano i te Atua i roto ia kotou na.

43 I aere mai nei au ma te ingoa o toku Medua, e kare kotou i oo mai iaku nei; kia aere mai tetai ma tona uaorai ingoa, e kite kotou i te reira.

44 Eaa kotou e akarongo ei, i tei kimi i ta kotou uaorai akameitaki, kare i akono i ta te Atua anake ra akameitaki?

45 Eiaa kotou e manako e, koau te tapepe ia kotou i mua te aroaro o te Medua; ko Mose tei tapepe mai ia kotou ta kotou i irinaki ana.

46 Angairi oki kotou i akarongo ia Mose, kua akarongo mai ia kotou iaku nei, i tata oki aia i te tuatua noku.

47 Kare kotou i akarongo i tana i tata ra, eaa katoa kotou e akarongo mai ei i taku nei tuatua.

PENE VI.

No te aronga tangata maata e pae tausani i angaiia e Jesu ra, e to Jesu aerenga na te tai

E MURI akera, ano adurā Jesu ki tetai pae i te roto i Galilea, ko tei karangaia i te roto i Tiberia ra.

2 E aere nga maata oki tei aru mai iaia, no te mea kua kite ratou i te semeio tana i rave i te aronga makimaki ra.

3 Aere adurā Jesu ki runga i tetai maunga, noo ora ki raro ma tana au pipi.

4 Kua vaitata te pasa, e oroa na te ngati Iuda ra.

5 Akara akera te matao Jesu, e kite adura aia e, e aerenga tangata maata te aere maira kia aia ra, kua tuatua adura kia Philipa, Eiea tatou ka oko ei i

te kai, ei angai anga i teia aronga tangata.

6 I akapera adurā Jesu i te timata anga iaia; kua kite oki aia uaorai i tana ravenga.

7 Kua tuatua maira a Philipa, Kia rua ua du rai te anere i te denari ei oko i te areto, kare ua e rava kia takitai ungaunga a kai i te tangata okotai.

8 Kua tuatua maira iaia tetai pipi ana ra, ko Anederea te taeake o Simona Petero.

9 E rima a tetai tamaidi mea ngiti areto, e rua oki ika; eaa ra te reira e rava'i i teiane aronga maata.

10 Kua karanga adurā Jesu, Ka akanoo ana ia ratou ki raro. E manganui oki te mâtâ i taua ngai ra, kua akanoo ora ratou ki raro, e rima oki tausani kia tatau.

11 Kua rave akerā Jesu i nga areto ra, akameitaki adura i te Atua, kua duku adura ki te au pipi ra, e na te au pipi e duku adu ki te aronga i noo ki raro ra; e kua duku katoa adura i te ika, e kua iu anake ora ratou.

12 E pangia rava akera ratou, kua karanga adura aia ki tana au pipi, Ka akabutu ana i te ungaungā kai mea riki i toe ra, eiaa tetai vai e akarukeia.

13 Kua akabutu ora ratou, e ki akera nga tapora raungauru marua, i te toeanga i taua nga areto e rima ra, ko tei toe i taua aronga tagnata ra.

14 E kite akera taua au tangata ra i te au semeio ta Jesu i rave ra, kua na ko akera, Ko taua peropheta mou rai teia, ko te ka aere mai ki te ao nei.

15 ¶ Te kite râ Jesu i to ratou manako, ka tiki mai iaia e kave e akaariki, oki akaou adura aia ki runga i te maunga koia anake ra.

16 E aiai akera, aere adura tana au pipi ki taatai.

17 E tae adura aia ki runga i tetai pai akatere adura ki Kapèrena: kua poiri rava kare akera a Jesu i tae mai kia ratou.

18 E peke adura taua roto ra i te matangi viviki.

19 Oe ua adura ratou e ruangauru marima setadia, e e toru oki, kite maira ratou ia Jesu i te aere ua anga na runga i te tai, e waitata ora aia ki te pae pai; kua matakua akera ratou.

20 Kua tuatua adura aia kia ratou, Koau teia, auraka e matakua.

21 Rekareka adura ratou iaia i te aere nga ki runga i te pai; tapae adura ratou i reira ra i te enua ta ratou e oe ra.

22 ¶ E ao akera, ko te au tangata i topa i te pae roto ra, kua kite ratou e, kare a Jesu i aere katoa ki runga i te boti i te aerenga o te au pipi ra, ko ratou anake ra tei akatere, kotai ua oki meâ boti i tae mai i reira.

23 (E buke boti kê ra no Tiberia mai tei tapae mai i waitata orai i taua ngai ta ratou i kaikai ra, akameitaki ei te Atura.)

24 E kia akara akera taua aronga tangata ra e, kare a Iesu i reira ma tana au pipi katoa ra, kake katoa adura ratou ki runga i te pai, oe adura ki Kapèrena i te kimi anga ia Jesu.

25 ¶ E kite adura ratou iaia i te pae o taua roto ra, kua tuatua adura ratou kiaia, E Rabi, i naea mai koe i konei?

26 Kua karanga adurâ Jesu kia ratou, Amene, amene, e tuatua adu au kia kotou, kare i to te mea i kite kotou i te au semeio ra, te kimi nei ra kotou iaku no te mea kua kai kotou i te manga, e pangia akera.

27 Auraka e angaanga i te kai pe ua, ko te kai râ te katika i te vairanga, e ka tae uadu ki te ora mutu kore ra, ko ta te Tamaidi a te tangata e oronga mai na kotou ra: koia oki tei akonoia e te Atua e tona Medua ra.

28 Kua ui maira ratou kiaia, Eaa ta te Atua angaanga i anoano kia rave matou?

29 Kua karanga maira Jesu kia ratou, na ko maira, Teia ta te Atua angaanga i anoano, kia akarongo kotou iaia i tana i tono mai.

30 ¶ Kua tuatua adura ratou kiaia, Eaa taau semeio e rave, kia akara du matou, ka akarongo adu ei matou iakoe? Eaa taau ravenga.

31 I kaikai ana to matou ai medua i te mana i te medebara ra, ko tei tataia ra e, "I omai ana aia i te areto no te rangi na ratou ei kaikai anga."

32 Kua tuatua maira Jesu kia ratou, Amene, amene, e karanga du au kia kotou, Kare a Mose i oronga mai i te areto no te rangi na kotou, kua oronga mai râ taku Medua i te areto tikai o te rangi na kotou.

33 Tera ta te Atua areto,

ko tei eke mai mei te rangi, e ko tei oronga mai i te ora no to te ao.

34 Kua karanga adura ratou kiaia, E te Atua, eiaa koe e tivata i te oronga mai i taua areto ra na matou.

35 Kua tuatua maira a Jesu kia ratou, koau te areto ora; ko te ka aere mai kiaku nei kare ua ia e pongi, ko te akarongo mai iaku nei kare ua ia e kaki vai.

36 Kua tuatua adu na ra oki au kia kotou, kua kite kotou iaku, e kare kotou i akarongo.

37 Ko ta taku Medua i oronga mai noku ra, ka tae mai ia kiaku nei; e ko te ka aere mai kiaku nei; e kore rava ia e kopaeia e au.

38 I eke mai nei oki au mei te rangi mai e akono i to tei tono mai iaku nei anoano, auraka i toku uaorai anoano.

39 Teia oki to tei tono mai iaku nei anoano, kia kore au e ngere i tetai i tana i oronga mai noku ra, kia akatu katoa-toaia e au kia tae ki te rā openga ra.

40 Ko teia oki to tei tono mai iaku nei inangaro, ko te kite i te Tamaidi e te akarongo iaia ra, ei ora mutu kore tona; e kia akatu akaou au iaia ki runga kia tae ki te rā openga ra.

41 Kua urutoe ora te ngati Juda iaia, koia i tuatua e, Koau te areto no te rangi mai.

42 ¶ Kua na ko akera ratou, Kare ainei teia ko Jesu te Tamaidi a Josepha ra, tei kite katoa oki tatou i tona medua tane, e tona medua vaine ra?

Eaa akera aia i karanga mai ei e, I eke mai nei au mei te rangi mai.

43 Kua tuatua mairā Jesu kia ratou, Eiaa na kotou e urutoe ua.

44 Kare te tangata e tae mai kiaku nei, mari ra kia akatae mai te Medua ko tei tono mai iaku nei iaia; koia taku e akatu akaou kia tae ki te rā openga ra.

45 Kua tataia oki i roto i te au peropheta ra e, Ka ope takiri ratou i te apiiia e te Atua. E teiane, ko te akarongo e te apiiia e te Medua ra, ko te ka tae mai ia kiaku nei.

46 Kare rā e tangata i kite i te Medua, mari ra ko to ko mai i te Atua ra, kua kite aia i te Medua ra.

47 Amene, amene, e karanga adu au kia kotou, Ko te akarongo mai iaku nei ei ora mutu kore tona.

48 Koau te areto e ora'i.

49 I kai ana to kotou ui medua i te mana i te medebara ra, e mate adura.

50 Ko te areto teia no te rangi mai, kia kaikai ua te tangata e kia kore rava e mate.

51 Koau te areto ora ko tei eke mai mei te rangi. Ko te ka kai i teiane, manga, ka tika ia i te ora anga; ko taku areto e oronga du, ko toku ia kopapa, ko taku ia e oronga du ei ora no to te ao.

52 ¶ Kua taumaro anake iora te ngati Juda ratou ratou uaorai, na ko akera, Eaa e tikai i teiane tangata kia oronga mai i tona kopapa e kai?

53 Kua tuatua mairai a Jesu

kia ratou, Amene, amene, e karanga adu au kia kotou, Kia kore kotou e kai i te kopapa o te Tamaidi a te tangata nei, e kia kore oki kotou e inu i tona toto, kare ia e ora i roto ia kotou.

54 Ko te ka kai i toku kopapa, e te ka inu i toku nei toto, e ora mutu kore tona, e naku aia e akatu akaou kia tae ki te râ openga ra.

55 E kai tikai oki toku kopapa, e toku toto.

56 Ko te ka kai i toku kopapa, e te ka inu i toku toto, ka tika ia i te noo anga i roto iaku, e ka noo uarai au i roto iaia.

57 Mei te Medua oki e ora ra, ko tei tonono mai iaku nei, e te ora nei oki au i te Medua ra; koia katoa te ka kai iaku nei, ka ora ia iaku.

58 Ko te areto teia no te rangi mai; kare ra mei te mana i kaingaia e to kotou ui Medua ra, mate adura oki ratou. Ko te ka kai i teiane manga, ka tika ia i te ora nga.

59 I roto i te sinago te tuatua anga aia i taua tuatua nei, i te apii anga i Kaperena ra.

60 ¶ E manganui tana aronga pipi i akarongo i taua tuatua nei, ina ko e, E tuatua rika-rika teia, ka kitea râ iaai?

61 Te kite râ Jesu ki roto iaia ra e te koumuumu ra tana au pipi i taua tuatua ra, kua karanga maira kia ratou, Te maitu na kotou i te reira?

62 Naringa paa kotou e kite ana i te Tamaidi a te tangata, i te oki akaou anga ki runga i te ngai tana i noo i muatanga?

63 No te Vaerua te ora, kare o te kopapa e buapinga, te tuatua taku e karanga kia kotou, e vaerua ia, e ora tei reira.

64 Kare ra tetai papaki o kotou nei i akarongo, (kua kite oki a Jesu mei muatanga mairai te aronga kare i akarongo, e te tangata e pikikaa kiaia ra.)

65 Kua tuatua adura aia, I karanga adu ei kia kotou e, kare rava te tangata e tae mai kiaku nei, kia kore e orongaia mai te tae e taku Medua ra.

66 ¶ Akaruke maira tetai papaki pipi ana i reira ra e manganui, kare maira i aru akaou iaia ra.

67 Kua tuatua mairā Jesu i te ngauru marua ra, Ka aere katoa ainei kotou?

68 Kua karanga adura a Simona Petero kiaia, E te Atua, ka aere tika matou kiaai ra? tei iakoe anake ra oki te ora mutu kore ra.

69 Kua akarongo akenei oki matou, e kua kite oki matou e, ko koe te Mesia, te Tamaidi a te Atua ora ra.

70 Kua tuatua mairā Jesu kia ratou, kare aina kua iki au ia kotou tino ngauru marua ra? e e diablo rai tetai o kotou nei.

71 Ko Juda i Kariota a Simona ra, no te ngauru marua uaorai aia ra, koia rai te tangata e pikikaa adu iaia ra.

PENE VII.

To Jesu aerenga ki te oroa akatu anga buakapa, to te au Pharisea mainaina anga ia Jesu.

E MURI akera, kare adurā Iesu i aere ki Judea, aere ua ora aia na Galilea ; no te mea te tapapa ra te ngati Juda iaia e ta.

2 ¶ Te vaiata ra te oroa akatu anga buakapa a te ngati Juda.

3 Kua karanga maira tona au taeake kiaia, Ka akaruke mai koe i teiane enua, ka aere adu koe ki Judea, kia kite katoa te au pipi aau ra i te angaanga tini taau e rave nei.

4 Te kimi oki i te rongo ra, kare ana e mea rave pōiri, e te rave nei koe i taua au mea ra, ka akakite ua du koe iakoe uaorai ki te ngai tangata.

5 (Kare akera i tona au taeake tikai i akarongo iaia.)

6 Kua tuatua adurā Jesu kia ratou, Kare rai i tae ki toku ora mou, ka tau ra te au ora katoa ia kotou.

7 Kare to te ao i makitakita mai ia kotou ; te riri mai nei ra iaku, i te mea kua akakite ua du au e, e tuatua kino ta ratou.

8 Ka aere kotou i taua oroa ra, kare au e aere vave du ki reira, kare akera i tae ki toku ora tikai.

9 E oti akera taua tuatua nei, noo ua ora aia i Galilea.

10 ¶ Kia riro ra tona ai taeake ra, kua aere katoa adura aia ki taua oroa ra, kare ra i aere akakite, i aere pōiri ua.

11 Kua ui aere ora te ngati Juda iaia i taua oroa ra, na ko akera, Teiea aia nei ?

12 Maata rava akera te kumu anga a taua aronga katoa ra iaia, i karanga etai papaki, E tangata meitaki aia. I na ko oki tetai papaki, Kare ; te tapikipiki ua nei aia i te tangata.

13 Kare ra e tangata i tuatua akakite kiaia, i te mataku i te ngati Juda.

14 ¶ E tae akera i rotobu i taua oroa ra, aere adurā Jesu ki roto i te iero, apii adura i reira.

15 Kua va ua ora te ngati Juda, na ko akera, No ea ra te kite o teiane tangata, kare oki aia i apiiia ?

16 Kua tuatua adurā Jesu kia ratou, Kare taku uaorai i taku e apii nei, nana ra, na tei tonomai iaku nei.

17 Ko te anoano marie i te akono i tona inangaro, ka kite aia i taku e apii nei, e na te Atua ainei, e naku uaorai ainei.

18 Ko te tuatua i te tuatua nona uaorai, te kimi ra ia i tona uaorai inuina, ko te kimi rā i te inuina no tei tonomai iaia ra, ka tau iaia te akarongo, kare ua e pikikaa o roto iaia ra.

19 Kare ainei a Mose i tei duku mai i te ture na kotou ? kare rava tetai o kotou i akono i taua ture ra. Eaa kotou e umu mai ei iaku e ta ?

20 Kua tuatua maira taua aronga maata ra kiaia, na ko maira, E demoni toou, koai tei umu iakoe e ta ?

21 Kua karanga adurā Iesu kia ratou, Okotai aku anga-

anga i rave akenei, e te va ua nei kotou katoa i tei reira.

22 I duku mai a Mose i te peritome kia kotou, (kare rā ta Mose, na te ui tubuna ra,) e te peritome nei kotou i te ra sabati.

23 I peritomeia te tangata i te ra sabati, kia kore e aka-apaia te ture a Mose, e te ma-kitakita mai nei oki kiaku i te mea kua akaora rava au i tetai tangata i te sabati?

24 Auraka e akara ua i te tu i vao ake, ka akono ra i te tuatua tika.

25 ¶ Kua na ko akera tetai pae tangata no Jerusalema, Kare ainei teia te tangata ta ratou i kimi nei e ta?

26 E i na! te tuatua aka-kite ua nei aia, kare ua ratou i tuatua adu kiaia: kua kite bu tikai aina te aronga mamaata e, ko te Mesia mou teia?

27 Kua kite ra tatou i te ngai no reira mai teiane tangata; kia tae mai ra te Mesia, kare e tangata e kite i te vai no reira mai aia ra.

28 Kua kapiki ua adura a Jesu i te apii anga i roto i te iero ra, Te kite na kotou iaku, e te ngai no reira mai au nei? Kare au i aere ua mai, kareka tei tono mai iaku nei, e tuatua mou tana, kare kotou i kite iaia.

29 Kareka au, kua kite au iaia, mei reira mai oki au nei, e nana oki au i tono mai nei.

30 ¶ Kua kimi adura ratou i te ravenga e obu iaia, kare ra e tangata i rave ua du te rima iaia, no te mea kare akera i tae i tona ora.

31 E manganui taua aronga tangata i akarongo iaia ra, kua na ko akera, Kia tae mai te Mesia, e maata ainei tana semeio e rave i ta teiane tangata?

32 E kite akera te au Pharisaea ra e, te akapera ra te tangata i te koumuumu iaia ra, kua tono adura ratou e te au taunga mamaata ra i te aronga taoonga e obu iaia.

33 Kua tuatua mairā Jesu kia ratou, koi noonoo ake au kio kotou nei, e te aere nei au kiaia i tei tono mai iaku nei.

34 E kimi kotou iaku nei, kare ra kotou e kite iaku, e te vai e nooia e au ra, kare kotou e tae ki reira.

35 Kua tuatua iora te ngati Juda ratou ratou uaorai, Ka aere ra aia kiesa, ka kore tatou e kite adu ei e iaia? Ka aere ainei aia ki te aronga i ngaro kê kio te ngati Hela ra, ka apii adu ei i te ngati Hela?

36 Eaa teiane tuatua tana e karanga mai nei e, Ka kimi kotou iaku, e kare kotou e kite iaku, e te ngai e nooia e au ra, e kore rava kotou e tae ki reira?

37 E tae akera ki te ra maata openga i taua oro ra, kua tu akerā Iesu, kua kapiki maira, na ko maira, Te tangata e kaki vai ra, ka aere mai aia kiaku nei inu ei.

38 Te akarongo mai iaku nei ra, ka riro aia ei ariki, e ka tae te vai ora no roto iaia, mei tei akakiteia mai e te au tuatua i tataia ra.

39 No te Vaerua e orongaia mai i te aronga e akarongo iaia

ra, taua tuatua tana i tuatua maira, kare rā oki i orongaia mai te Vaerua i reira, no te mea kare akerai a Jesu i akateiteia ra.

40 Kua na ko akera tetai pae o taua aronga i kite i taua tuatua ra, Ko taua peropheta mou ra teia.

41 Kua na ko akera tetai pae, Ko te Mesia teia: kua na ko akera tetai papaki, Kare, no Galilea te Mesia?

42 Kare ainei i na ko te tuatua i tataia ra e, No te kobu o Davida te Mesia, no Betelehe-ma ra no te oire no reirā Davida ra.

43 Kua tubu ora te tauetono i taua au tangata ra iaia.

44 Te anoano ra tetai pae tangata e obu iaia, kare ua ra e tangata e rave adu te rima iaia.

45 ¶ Kua oki maira taua aronga taoonga ra ki te au tau-nga mamaata ra e te au pharisea; kua tuatua adura ratou kia ratou, Eaa kotou i kore ei i arataki mai iaia?

46 Kua karanga maira taua aronga taoonga ra, Kare rava e tangata e tau te tuatua i ta tera-ra tangata.

47 Kua tuatua adura te au Pharisea, Kua vavare katoa kotou iaia?

48 Kua akarongo ainei tetai o te ui rangatira, e o te au Pharisea iaia?

49 Kareka teianei au tangata tei kore i kite i te ture nei, kua anatemaia ia.

50 Kua karanga adura tetai tangata no ratou uaorai, ko Nikodemo *te ingoa*, (ko tei aere mai ia Jesu i te po ra.)

51 Ka tika aina i ta tatou nei ture kia akaapa adu tatou i te tangata, kare e timata na i te akarongo adu i tana tuatua e kia kitea?

52 Kua tuatua maira ratou kiaia, No Galilea aina koe? Ka kimi ana kia kite koe, kare rava e peropheta i tubu i Galilea.

53 Aere ua adura te tangata katoa ki tona kainga, ki tona kainga.

PENE VIII.

Te vaine moikea i apaiia mai kia Jesu ra. Ko Jesu te marama no teianei ao.

AERE adurā Jesu ki runga i te maunga i Oliveta.

2 E i te pōpongi roa ra kua oki akaou maira aia ki roto i te iero ra, e kua aere katoa maira te tangata kiaia ra, noo ora aia ki raro, apii adura ia ratou.

3 Kua arataki maira te au tata tuatua e te au Pharisea iaia i tetai vaine, i rokoia du te raveia ra, kua duku maira ratou kiaia i rotobu.

4 Kua tuatua maira ratou kiaia, E Rabi, rokoia du teianei vaine te rave mouia ra.

5 I tuatua maira oki a Mose ki roto i te ture e, ka pei te reira i te toka; eaa taau tuatua?

6 I pera mai ratou i te tapi-kipiki agna mai kiaia, kia rauka ta ratou tapepe anga mai kiaia. Kua piko orā Jesu ki raro, kua tata ora tona rima i te tuatua ki runga i te one.

7 Kua tamou nui maira ratou i te ui anga mai kiaia, tu

akera aia ki runga, kua karanga adura kia ratou, Na te tangata ara kore i roto ia kotou na e pei adu te toka mua.

8 Kua piko akaou ora aia ki raro, tata akaou ora aia ki runga i te one.

9 E kite akera ratou i taua tuatua ra, kua unui takitai ua adura ratou, ko te tangata pakari tei na muā na, e tae ua adura ki te tangata openga, toe ora ko Jesu anake ma taua vaine ra i te tu ua anga i roto.

10 Kua tu akerā Jesu ki runga, e kite adura kare ua e tangata, mari ra ko taua vaine anake ra, kua tuatua aia kiaia, E maine, teiea te aronga i tapepe mai iakoe na? Kare ua e tangata i akautunga mai iakoe nei?

11 Kua karanga maira aia, Kare ua e taku Atu : kua tuatua adurā Jesu kiaia, Kare katoa au e akautunga iakoe, ka aere, auraka rā e ara akaou.

12 ¶ Kua karanga akaou adurā Jesu ki te tangata, na ko adura, Koau te marama o teiane i ao, ko te aru mai kiaku nei, kare aia e aere noa ua i te poiri, e marama ora tona.

13 Kua patoi maira te au Pharisea kiaia, Te akameitaki nei koe iakoe uaorai, kare taau akameitaki e akonoia.

14 Kua karanga adurā Jesu, Tuatua uaorai au iaku uaorai, ka tika rai kia akonoia taku tuatua, kua kite oki au i te ngai no reira au nei, e te ngai taku e aere nei, kare kotou i kite i te vai no reira mai au nei, e teiane i vai taku e aere nei.

15 No te kopapa ta kotou akono anga, kare au eumiumi i te tangata.

16 E kia eumiumi oki au ra, ka tika taku eumiumi anga kia akonoia ; kare oki e, koau anake teia, koau ra ma taku Medua katoa, ko tei tonono mai iaku nei.

17 Kua tata ia oki ki roto i ta kotou ture ra e, Kia akatika mai nga tangata tokorua ra, e tuatua tika ia.

18 Koau oki tetai i akatika iaku uaorai, e te Medua oki ko tei tonono mai iaku nei tetai i akatika katoa mai iaku nei.

19 Kua ui maira ratou kiaia, Teiea ua toou Medua? kua karanga adura a Jesu, Kare kotou i kite iaku e toku Medua katoa, naringa kotou i kite iaku ra, kua kite katoa ia kotou i toku Medua.

20 I te akabutu anga apinga te tuatua anga a Jesu i teiane i au tuatua, i tana apii anga ki roto i te iero ra, e kare rava e tangata i rave adu iaia, kare akera i tae ki tona ora mou.

21 Kua tuatua akaou adurā Jesu kia ratou, Te aere ke nei au, e kimi kotou iaku, e ka mate kotou ma ta kotou ara katoa, e kore kotou e tae ki te vai taku e aere nei.

22 Kua na ko akera te ngati Juda, Ka ta ainei aia iaia uaorai i karanga mai ei e, Kare kotou e tae ki te vai taku e aere nei?

23 Kua tuatua adura aia kia ratou. No raro nei kotou, no runga au : no teiane i ao kotou, kare au no teiane i ao.

24 I tuatua adu ei au kia ko-

tou e, ka mate kotou ma ta kotou ara katoa, kia kore kotou e akorongo, koau ra, ka mate rai kotou ma ta kotou ara katoa.

25 Kua ui maira ratou kiaia, Koai oki koe na? Kua tuatua adurā Jesu, Ko taku oki i tuatua adu kia kotou i muatanga.

26 E manganui oki taku tuatua e akatau ia kotou, ko tei tono mai iaku nei ra, e tuatua mou tana, e te tuatua adu nei au ki to te ao nei i te au tuatua taku i akarongo kiaia ra.

27 Kare ratou i kite e ko te Medua tana e tuatua ra.

28 Kua karanga adurā Jesu kia ratou, Kia akateiteia e kotou te Tamaidi a te tangata nei, ei reira kotou e kite ei e, koau ia; kare aku peu rave ua, ko ta taku Medua ra i apii mai iaku ra ko taku ia e rave nei.

29 Ko tei tono mai iaku nei, tei vaitata uorai ia kiaku nei, kare te Medua i akaruke ua iaku nei koau anake ra, e kare oki au i dukumoe i te rave i te mea e mareka mai ei aia.

30 E kia akapera adura aia i te tuatua anga i teiane au tuatua, maata ua maira te tangata i akarongo iaia.

31 Kua tuatua adurā Jesu ki te ngati Juda i akarongo mai iaia ra, I tabu tika kotou i taku tuatua, e pipi tikai kotou naku i reira.

32 Ka kite ia kotou i te tuatua mou, e na te tuatua mou kotou e akatiama.

33 ¶ Kua tuatua maira te tai pae kiaia, E tamariki matou na Aberaama, kare ua matou i roiro ei tuikaa na etai kē, eaa

koe i karanga mai ei e, ka akatiamaia kotou?

34 Kua karanga adurā Jesu kia ratou, Amene, amene, e tuatua adu au kia kotou, ko te tabu i te tuatua kino ra, e tavini ia na te kino.

35 Kare oki te tavini e noo tikai i te ngutuare, kareka ra te Tamaidi, ka noo tikai ia i reira.

36 Na te Tamaidi kotou e akatiama ra, kua tiama tika ia kotou.

37 Kua kite au e tamariki kotou na Aberaama, te umumu mai nei ra kotou iaku e ta, no te mea kare o taku tuatua e vairanga i roto ia kotou na.

38 Te tuatua nei au i te tuatua taku i kite i toku Medua: e te akono na oki kotou i ta kotou i kite i to kotou Medua.

39 Kua karanga maira ratou kiaia, Ko Aberaama to matou medua: kua tuatua adurā Jesu, Naringa kotou ei tamariki na Aberaama ra, e akono ia kotou i ta Aberaama ra tuatua.

40 I tenana ra, te umumu mai nei kotou iaku e ta, i te tangata i akakite adu kia kotou i te tuatua mou i taku i kite i te Atua ra. Kare uā Aberaama i akapera.

41 Te akono na kotou i te tuatua a to kotou medua. Kua tuatua maira ratou kiaia, Kare matou i ta te poreneia i anau. Okotai rai o matou medua, ko te Atua.

42 Kua tuatua adurā Jesu kia ratou, Angairi ko te Atua to kotou medua ra, kua anoano mai kotou iaku, no reira oki au

nei, mei reira mai au i te Atua ra, kare oki au i aere ua mai, nana oki au i tono mai.

43 Eaa kotou i kore ei i kite i taku tuatua? No te mea kare e tika ia kotou i te akorongō i taku tuatua.

44 Ko te diabolō to kotou medua, i akatika'i kotou i te anoano o to kotou medua ra; e ta tangata aia mei ito mai rai: kare aia i akono i te tuatua mou, no te mea kare e tuatua mou o roto iaia. Kia tuatua aia i te pikikaa ra, kua tuatua aia i te tuatua e tau iaia uaorai, e pikikaa aia e, e medua oki no te pikikaa.

45 No te mea e tuatua mou taku i karanga adu nei, i kore ei kotou i akarongō mai iaku.

46 Koai to kotou e akakite i taku pikikaa? E e tuatua mou taku ra, eaa kotou i kore ei i akarongō mai iaku nei?

47 No te Atua aia ra, ka akono ia i ta te Atua tuatua, kare kotou i akono i tana tuatua, no te mea kare kotou i to te Atua.

48 ¶ Kua tuatua maira te ngati Juda kiaia, Kare ainei te tuatua, tika ta matou i karanga nei e, no Samaria koe, e e demoni toou?

49 Kua tuatua adura Jesu, Kare oku e demoni, te akameitaki nei ra au i taku Medua, e te akakino nei oki kotou iaku.

50 Kare oki au i kimi i toku uorai inuinu, te taka adura tei kimi i tei reira, nana rai e akono.

51 Amene, amene, e karanga adu au kia kotou, Ko te akono

i taku ra tuatua, kare rava aia e kite i te mate.

52 Kua tuatua maira te ngati Juda kiaia. Kua kite adura matou e, e demoni tikai toou; kua mate oki a Aberaama, e te au peropheta katoa oki, e te tuatua mai na koe e, Ko te akono i taku ra tuatua, e kore aia e kite i te mate.

53 E maata ua aina koe ia Aberaama i to matou medua i mate ra? e te au peropheta katoa oki kua mate, koai koe na i toou maara anga?

54 Kua tuatua adura Jesu, Kia akameitaki au iaku uaorai e akameitaki anga marikonga kore taku, ko toku Medua tei akameitaki mai iaku, ko ta kotou i tuatua na e, e Atua no kotou.

55 Kare kotou i kite iaia; kua kite ra au iaia; naringa au i na ko ana e, Kare au i kite iaia, kua riro au ei pikikaa mei ia kotou katoa na; kua kite ra au iaia, e te akono nei au i tana tuatua.

56 I umere ana oki to kotou medua o Aberaama i toku nei tuatau kia kite aia, e kite adura e mareka adura oki.

57 Kua tuatua maira te ngati Juda, Kare akera i tae i te rima o te ngauru anga i toou mataiti, e kua kite oki koe ia Aberaama?

58 Kua tuatua adurā Jesu kia ratou, Amene, amene, e tuatua adu au kia kotou, Kare Aberaama i anau ra, TE NOO NEI AU.

59 Kua rave ora ratou i te toka e pei iaia; akangaro ua ora a Jesu, na roto bu adura ia

ratou te aere, aere adura ki vao mai i te iero ra.

PENE IX.

Te tangata matapo i akaoraia ra, te riri anga o te au Pharisea.

E TE aere ua ra a Jesu ra, kite adura aia i tetai tangata matapo mei te anau anga mai.

2 Kua ui maira tana au pipi kiaia, na ko maira, E Rabi, naai te ara, nana uaorai aina e na nga madua ainei, i anau matapo mai ei aia?

3 Kua karanga adurā Jesu, Kare to te ara a teianei tangata, e te ara a nga madua ra, no te mea ra kia kitea te angaanga a te Atua iaia nei.

4 Ka rave au i te angaanga a tei tonono mai iaku nei, koi vai ake te ao; te vaitata mai nei oki te po kare roa e tangata e angaanga i reira.

5 Te noo nei au i te ao nei, koau te marama o teianei ao.

6 I akapera aia i te tuatua anga, kua tutua ora i te uavare ki raro i te repo, kua oi ora tona uavare e te repo, kua amo adura te repo ki te mata o taua tangata matapo ra.

7 Kua karanga adura aia, Ka aere ka orei i to mata ki te vai i Siloama ra, (koia oki Tonokia) aere adura aia orei, kua aere maira oki ma te kite.

8 ¶ Kua tuatua ora to reira ra, e te aronga i kite iaia i muatangana i te vai matapo anga, Kare ainei teia tei tangata i noo ua ma te pati i te apinga ra?

9 Kua tuatua maira tetai aronga, Koia oki teia; kua

na ko maira tetai papaki, Mei iaia nei rai te tu; kua tuatua maira aia uaorai, Koau oku paa ia.

10 Kua ui adura ratou kiaia, I akapeeia to mata i buera'i?

11 Kua tuatua maira aia, I oiia te repo e tetai tangata ko Jesu te ingoa, e kua amo maira ki toku mata, kua na ko maira kiaku, Ka aere ki te vai Siloama ra ka orei i to mata, aere adura au orei ora, e kite adura.

12 Kua ui adura ratou kiaia, Teiea taua tangata ra? Kua tuatua maira aia, Kare ua au i kite?

13 ¶ Kua arataki adura ratou i te tangata matapo ra ki te au Pharisea ra.

14 E sabati te ra i oi ei a Jesu i te repo, i te akaora anga i tona mata.

15 Kua ui katoa maira te Pharisea ra kiaia i te ora anga o tona mata: kua karanga adura aia, I amokia e ia taku mata i te repo; e orei ora au, e te kite nei au.

16 Kua na ko akera tetai papaki o taua au Pharisea ra, Kare teia tangata i to te Atua, kare aia i akono i te sabati: kua na ko akera tetai papaki, Eaa e tika'i i te tangata ara kia rave te semeio mei teianei? kua mavete ora ratou.

17 Kua ui akaou maira ratou ki taua tangata matapo ra, Eaa taau tuatua kiaia, koia i akaora i to mata na? kua tuatua adura aia, E peropheta tikai aia.

18 ¶ Kare ra te ngati Juda i akarongo e, e matapo to taua tangata ra, e kua akaoraia

oki tona mata, kia tiki ra ratou i nga madua o taua tangata ra.

19 E kua ui adura ratou kia raua, na ko adura, Ko ta korua tamaidi teia i tuatua ra e, i anau matapo mai aia, Eaa oki aia i kite ei i teiane? ?

20 Kua tuatua maira nga madua nona ra, Kua kite maua, na maua tikai teiane? tamaidi, e matapo tikai aia mei te anau anga mai.

21 Kareka ra te mea i kite ei aia i teiane, kare ua maua i kite, ka ui adu kiaia; kua pakari oki aia, e nana uaorai e tuatua mai.

22 I akapera adura nga madua nona ra, no te mea te mataku ra raua i te ngati Juda, kua akatau ana te ngati Juda i ta ratou tuatua, i te tangata e na ko e, koia te Mesia, ka duku iaia ki vao i te sinago ra.

23 I karanga adu ei nga madua nona ra, Kua pakari aia ka ui adu kiaia.

24 Kua tuatua akaou adura ratou ki taua tangata matapo ra, na ko adura kiaia, Ka akameitaki i te Atua; kua kite oki matou e, e tangata ara teiane? tangata.

25 Kua karanga maira aia, Kare au i kite e, e tangata ara aina aia, okotai rava taku tuatua i kite, e matapo toku i muatangana, e teiane? te kite nei au.

26 Kua tuatua akaou adura ratou kiaia, I aa mai aia iakoe, i akapeea aia i te akaora anga i to mata?

27 Kua karanga maira aia, Kua aaki adu na oki au ia ko-

tou, kare kotou i akarongo? eaa ra oki kotou i anoano akaou ei i te akarongo? ei pipi katoa ainei kotou nana?

28 Kua akakino adura ratou iaia, na ko adura, Ko koe tana pipi; kareka matou e pipi matou na Mose.

29 Kua kite matou e kua tuatua mai te Atua ia Mose; kareka teiane? tangata kare matou i kite iaia e noea aia.

30 Kua tuatua maira taua tangata ra kia ratou, na ko maira, E mea tu ke oki tena, kare kotou i kite e noea aia, e i na, kua akabuera oki aia i toku nei mata.

31 Kua kite oki tatou e, kare te Atua e akarongo i te tangata ara, ko te tangata ra e akamori i te Atua, e ko te akono i tona anoano, ko tana ia e akarongo.

32 Kare akerai i kitea te matapo anau nei i te ora nga i te tangata, mei te maani anga mai o te enua nei.

33 Naringa teiane? tangata kare to te Atua ra, e kore rava tana ravenga e tika.

34 ¶ Kua tuatua adura ratou iaia, I anau mai koe mei te ara, ka apii mai koe ia matou? kua duku adura ratou iaia ki vao.

35 ¶ E kite akera a Jesu e kua dukuia aia e ratou ki vao, e aravei akera aia iaia, karanga adura kiaia, Kua akarongo koe i te Tamaidi a te Atua?

36 Kua karanga maira aia, E te Atua, koai aia, kia akarongo adu au iaia?

37 Kua tuatua adurā Jesu kiaia, Kua akara oki koe iaia,

e koia oki teia e tuatua adu kia koe nei.

38 Kua karanga maira aia, E te Atu, kua akarongo au, kua tipapa ora ki raro i mua i tona aroaro.

39 ¶ Kua karanga adurā Jesu, I aere mai nei au ki te ao nei kia tubu te tuatua tika, kia kite te aronga kite kore nei, e kia riro te aronga kite ra, ei matapo.

40 Te akarongo maira tetai aronga Pharisea i reira katoa i taua tuatua ra, e kua karanga maira kiaia, E matapo katoa ainei matou nei?

41 Kua tuatua adura a Jesu, Naringa kotou e matapo ra kare ia a kotou e ara, te tuatua maira kotou e, kua kite matou, te vai ra ia ta kotou ara.

PENE X.

Ko Jesu te ngutupa o te mamoe, koia oki te Mesia.

AMENE, amene, e tuatua adu au kia kotou, Ko te kore e na te ngutupa te tomo ki roto i te koro o te mamoe ra, ko te kake na rugua i te koro ra, e keia ia e te noni.

2 Na te ngutupa rai te tiaki mamoe te tomo.

3 E kiriti mai ia te tiaki pa ra iaia, e ka akarongo mai te mamoe i tona reo, e karanga adu aia ki tana uaorai mamoe ma te taaiku du te ingoa, e e arataki aia ia ratou ki vao.

4 E arataki aia i tana uaorai mamoe ki vao ra, e na mua aia ia ratou te aere, e ka aru mai ratou iaia, kua kite oki ratou i tona reo.

5 Kare ratou e aru i te tangata ke, ka oro ke ratou i reira, kare oki ratou e kite, i te reo o te tangata ke.

6 I tuatua tika adurā Jesu kia ratou i taua parabole nei, kare ua ra ratou i kite i te tuatua tana i karanga adu kia ratou ra.

7 Kua tuatua akaou adurā Jesu kia ratou, Amene, amene, e karanga adu au kia kotou, Koau te ngutupa o te koro.

8 Ko te tomo na tetai mata-ara ke ra, e keia ia e te noni, kare ra te mamoe i akarongo ia ratou.

9 Koau te ngutupa, ko te na konei mai kiaku nei te tomo ra, ka ora ia, ka aere ua ratou ki roto e ki vao, ka rauka oki te kai.

10 Ko te keia anake ua ta te keia i aere mai ei, e ko te ta oki e kia pou takiri; i aere mai nei ra au kia rauka to kotou ora, e kia maata ua du te ora.

11 Koau te tiaki mamoe meitaki ra. Ka oronga te tiaki mamoe meitaki i tona uaorai ora no te mamoe.

12 Ko tei ouia ra, kare aia i te tiaki mamoe ra, kare oki tona uaorai te mamoe, kia kite ra aia i te luko i te aere anga mai, te akaruke ra i te mamoe, oro ke adura, te motumotu ra tetai papaki i te luko, bueurikiriki ke adura te anana.

13 I oro ei te ouia ra, no te mea e tangata ouia aia, kare aia i akono i te mamoe.

14 Koau te tiaki mamoe meitaki ra, kua kite au i taku uaorai, e kua kitea au e ratou.

15 (Mei te Medua i kite iaku nei ra, e koau i kite i te

Medua ra;) e e oronga oki au i toku ora no te mamoe.

16 E mamoe ke adu rai taku, kare no teianei koro, e arataki katoa mai au ia ratou e tikai e akarongo mai oki ratou i toku nei reo, kia kotai oki anana, kotai oki tiaki.

17 I akaperepere mai ei taku Medua iaku, koau i oronga i toku ora, ka rave akaou adu ei.

18 Kare rava e tangata e roiro ei kia aru, naku uaorai e oronga ua du, ka tika oki iaku kia oronga, ka tika oki kia rave akaou, ko ta toku Medua ia i akaue mai iaku nei.

19 ¶ Kua mavete akaou ora te ngati Juda i taua tuatua ra.

20 Kua tuatua ora tetai pae o ratou, E demoni tona, e kua neneva, eaa kotou i akarongo adu ei iaia?

21 Kua na ko akera tetai papaki, Kare teia tuatua i ta te tangata demoni: ka ora ainei te matapo i te demoni?

22 ¶ I reira te oroa o te akaou anga i Jerusalema, e paroro taua tuatau ra.

23 E te aacere ua ra a Jesu ki roto i te iero i te porotiko o Solomona ra.

24 Kua akapini akera te ngati Juda iaia, kua tuatua maira kiaia, Mei te aa rā te mamao o to matou eumiumi anga iakoe? Ko te Mesia koe ra, ka akakite ua mai koe.

25 Kua karanga adurā Jesu kia ratou, Kua tuatua adu oki au kia kotou ko te angaanga tini taku e rave ma te ingoa o taku Medua ra, ko te akakite mai ia iaku, kare ra kotou i akarongo mai.

26 Kareka kotou kare ia e akarongo, no te mea kare kotou i taku mamoe.

27 Ka akarongo mai taku mamoe i toku reo, ko taku i tuatua adu kia kotou ra, kua kite au ia ratou, e ka aru mai oki ratou iaku.

28 E oronga adu au i te ora mutu kore no ratou; kare rava ratou e mate, e kare rava oki ratou i roto i toku nei rima e roiro ia etai ke me aru mai.

29 Ko taku Medua i oronga mai ia ratou noku ra, ko te maata ua du ia, e kare e tika ia etai kia aru adu ia ratou i roto i te rima o toku Medua ra.

30 Ko au e to Medua ra kotai ia.

31 ¶ Kua rave akaou ora te ngati Juda i te toka e ka pei iaia.

32 Kua tuatua adurā Jesu kia ratou. Manganui oki taku angaanga meitaki i akakite adu kia kotou na toku Medua; no teea ra angaanga i taua angaanga tini ra, ka pei mai ei kotou iaku i te toka na?

33 Kua karanga maira te ngati Juda kiaia, Kare to te angaanga meitaki i pei adu ei iakoe i te toka, no te belasephemi, ko koe te tangata na i aka Atua iakoe ua orai.

34 Kua karanga adurā Jesu, Kare ainei i tataia ki roto i ta kotou ture ra e, "Kua karanga na au e, e atua kotou."

35 I karanga te ture ki te aronga i tuatua ia adu i te tuatua a te Atua ra e, e atua ratou, e kare oki e apa te tuatua i tataia ra.

36 I tapepe mai oki kotou i

te belasephemi i ta te Medua i akataka ei Aposetolo nana i te ao nei, aia i karanga iaia uaorai e, e Tamaidi nana?

37 Kare au i rave i te angaanga a taku Medua ra, auraka e akarongo mai iaku.

38 Te rave nei râ au, e kare kotou i akarongo mai iaku ra, ka akarongo i te au angaanga kia kite kotou, kia akarongo kotou e tei roto iaku te Medua, e tei roto oki au iaia.

39 ¶ Kua timata akaou adura ratou i te obu iaia, ora adura ra aia i to ratou rima.

40 Aere akaou adura aia e topa maira Joridana, i te vai ta Joane i bapetizo i muatangana, noo adura i reira.

41 E manganui tei aere mai kiaia ra, e kua karanga ora e, Kare ua a Joane e semeio i rave, kareka te au tuatua katoa ta Joane i tuatua i teiane tangata, e tuatua mou anake ia.

42 E manganui oki tei akarongo iaia i reira.

PENE XI.

To Jesu akatu anga ia Lazaro: te tuatua a te au Pharisea e ta ia Jesu, te tuatua oki a Kaia-pha.

THE MATE ra tetai tangata i te maki ko Lazaro te ingoa, no Betania no te oire o Maria e tona taeake o Mareta ra.

2 (Ko Maria i akatainu i te Atua i te rakau kakara ra, e tei orei i tona vaevae i tona rauru, nona te tungane i mate i te maki ra ko Lazaro.)

3 Kua tonu adura nga tuaine i te karere e akakite ia Jesu, na

ko adura, E te Atua, e i na, te tangata akaperepere naau ra, kua mate i te maki.

4 E kite akerā Jesu i taua tuatua ra, kua na ko akera, Kare tei reira maki e riro ei maki mate, kia akameitakiia ra te Atua, e kia akameitakiia te Tamaidi a te Atua i tei reira.

5 E aroā Jesu ia Mareta, e tona taeake e ia Lazaro oki.

6 E kite akera e kua mate aia i te maki, noo orā Jesu i taua vai ra e po rua.

7 ¶ E muri akera kua karanga adura aia ki tana au pipi, Ka taki aere tatou ki Judea.

8 Kua karanga mai te au pipi, E Rabi, i anoano akenei te ngati Juda iakoe e pei i te toka, e te aere akaou rai koe ki reira?

9 Kua tuatua adurā Jesu, Kare ainei kotai ngauru marua te ora i te ao kotai nei, e kia aere oki te tangata i te ao ra, e kore e turori, no te mea kua kite aia i te marama no teiane nei ao.

10 Kareka kia aere aia i te po ra, ka turori ia, no te mea kare e marama.

11 I akapera adura aia, e oti akera kua tuatua adura aia kia ratou, Kua moe to tatou oa ko Lazaro, e te aere nei au e akara iaia.

12 Kua tuatua maira tana au pipi, E te Atua, te moe ra aia ka ora ia.

13 No te mate te tuatua a Jesu i karanga adura, i manako ra ratou e no te moe tika tana i tuatua maira.

14 Kua akakite ua adurā

Jesu kia ratou Kua mate takiri a Lazaro.

15 Te meitaki nei ra au, i te mea kare au i reira kia akarongo oki kotou, e taki aere tatou kia aia ra.

16 Kua tuatua akerā Toma, koia oki Didimo ra, ki tona au taeake pipi ra, e taki aere tatou kia mate katoa adu.

17 ¶ E tae adurā Jesu ra, kite akerā aia e, po a adura aia ki roto i te vaarua.

18 Te vaitata ua ra Betania ki Jerusalema, ka tau i te ngauru marima te setadia ra.

19 Kua aere maira te ngati Juda e manganui kia Mareta raua ko Maria ra, e tamaana ia raua i to raua tungane i mate ra.

20 Kite akerā Mareta e te aere mai nei a Jesu, aere adura aia e aravei akerā iaia, karekā Maria noo ua ora ia ki roto i te are.

21 Kua tuatua adurā Mareta kia Jesu, E te Atua, naringa koe i konei, kare e mate toku tungane.

22 Kua kite ra au, ko taau e pati i te Atua ra, na te Atua ia e omai naau i teiane rai.

23 Kua karanga mairā Jesu kiaia, Ka tu akaou mai ia to tungane.

24 Kua karanga adura Mareta kiaia. Kua kite au e, ka tu akaou mai ra aia i te tu akaou anga i te rā openga ra.

25 Kua tuatua mairā Jesu kiaia, Tei iaku rai te tu akaou anga e te ora, ko te akarongo mai iaku ra, mate ua du rai ka ora ra ia.

26 E te tangata ora katoa nei

e akarongo mai iaku ra, kare rava du ia e mate.

27 Kua akarongo ainei koe i te reira? Kua tuatua adura aia kiaia, E te Atua, a, kua akarongo au e ko koe te Mesia, te Tamaidi a te Atua ko te aere mai ki te ao nei.

28 E oti akerā taua tuatua ra, oki maira aia e karanga adura kia Maria ki tona taeake, koumuumu adura e, Tera ake te Oromedua, e te tuatua maira iakoe.

29 E kite akerā a Maria i te reira, tu ua akerā ki runga i reira ra, aere adura iaia ra.

30 Kare akerā a Jesu i tae ki roto i te vila, tei te ngai rai i aravei adu ei a Mareta iaia ra.

31 E te ngati Juda i noo i roto i te are, i te tamaana anga ia Maria ra, kite akerā iaia i te tu vave anga ki runga, e te aere anga ki vao, kua aru maira iaia, na ko akerā, Te aere adura aia i te tanu manga e aue ei.

32 E tae adurā Maria ki taua vai tei reira a Jesu ra, kite adura iaia, piko ora ki raro i tona pae vaevae, na ko adura, E te Atua, naringa koe i konei e kore e mate toku tungane.

33 E kite akerā iaia i te aue anga e te ngati Juda i aere katoa maira, ngunguru ora aia ngareburebu adura tona vaerua.

34 Na ko adura, Teiea aia te vaio angaia e kotou? Kua na ko maira ratou, E te Atua, ka aere mai ka akara.

35 Aue iorā Jesu.

36 Kua tuatua ora te ngati Juda, ka akarā na i tona aroa iaia!

37 Kua na ko akera ra tetai pae o ratou, Kare ainei e tika iaia kia akakore mai i te maki o teiane tangata, ko tei akaora oki aia i te tangata matapo ra?

38 Kua nguguru akaou orā Jesu ki roto iaia ra, e tae adura ki te tanu manga; e ana, kua momaniia te ngutupa ki te toka.

39 Kua karanga adurā Jesu, Ka uri ke adu i te toka na. Kua tuatua maira Maria te tuaine o taua tangata i mate ra, E te Atua, kua aunga tenana ko te po a oki teia.

40 Kua karanga adurā Jesu iaia, Kare au i karanga kiakoe e, Kia akarongo koe ra, ka kite koe i te mana no te Atua?

41 Kua uri ke adura ratou i taua toka ra, akara adura te mata o Jesu ki runga, kua karanga adura, E taku Medua, e akameitaki au iakoe, ko koe i akarongo mai kiaku nei.

42 Kareka au kua kite au e, ka akarongo mai rai koe iaku, no teiane ra aronga tangata i akapiri mai kiaku nei i karanga adu ei au, kia kite ratou e, naau au i tonu mai.

43 E oti akera taua tuatua ra, kua akateitei akera i tona reo, kua kapiki adura, E Lazaro, ka aere mai ki vao.

44 Kua aere maira taua tangata i mate ra ki vao kua takai ia nga rima e nga vaevae, i vaiia oki te mata i te kakau: kua karanga adurā Jesu kia ratou, Ka tatara, e duku adu iaia kia aere ana.

45 E te ngati Juda i aere mai ia Maria ra, ko tei kite i

ta Jesu i rave ra, manganui ia tei akarongo iaia.

46 Aere adura tetai pae o ratou i te au pharisea ra, kua tuatua adura kia ratou i ta Jesu i rave ra.

47 ¶ Kua akabutubutu maira te au taunga mamaata ra e te au pharisea i te Sinederi, na ko akera, Te aa ua nei tatou, maata rava ta teiane tangata semeio e rave nei.

48 I vaio ua adu rai tatou iaia mei teiane rai, ka ope takiri te tangata i te akarongo iaia, e ka tae mai oki to Roma e rave i to tatou nei vai e te enua katoa oki.

49 Kua tuatua akera tetai o ratou uarai Kua apiapi rava kotou, ko Kaiapha te ingoa ko te taunga maata ia i tei reira mataiti.

50 Kare kotou i manako e, e mea meitaki ia tatou kia mate adu te tangata okotai, kia ora te tangata ravarai nei, auraka oki e mate te enua katoa.

51 I akapera adura aia, kare ra tana tikai taua tuatua ra, koia ra te taunga maata i te reira tuatau, e kua akakite atea maira aia e, e mate a Jesu no te reira enua.

52 Kare ra no te reira enua anake ra, kia akabutubutu ra aia i te ngai okotai i te tamariki a te Atua i pueurikiriki aere ra.

53 E mei taua râ mairai ratou i te akatau anga i ta ratou tuatua e ta iaia.

54 Kare adurā Jesu i aere akakite ki te ngati Juda, i aere adura ra aia i tetai vai i vaitata i te medebara ra, i tetai oire ko

Epheraima te ingoa, noo adura i reira e tana au pipi katoa oki.

55 ¶ Kua vaitata te pasa a te ngati Juda ra, e manganui to uta mai i aere atea ua na i Jerusalema e tama ia ratou i te pasa.

56 Kua ui ora ratou ia Jesu, na ko akera ratou ratou uaora'i i to ratou tu anga ki roto i te iero ra, E aa to kotou mana-ko? Kare aina aia e tae mai i teiane i oroa.

57 Kua duku mai na te au taunga mamaata e te au pharisea i te tuatua e, ko te tangata i kite iaia i te noo anga ka aaki aia, kia tiki ratou iaia e rave.

PENE XII.

To Maria akatainu anga i te vaevae o Jesu, te butubutu anga o te tangata kia kite ia Lazaro e to Jesu aerenga ki Jerusalema ra.

E PO ono toe i te pasa ra, kua aere mairā Jesu ki Betania i te vai i nooia e taua tangata i mate ra, ko tana i akatu akaou mei te mate maira.

2 Kua rave ora ratou i tetai kaingā kai nana, ko Mareta tei raverave, ko Lazaro ra tetai i noo katoa i taua kaingā kai ra, e koia katoa oki.

3 Kua rave akerā Maria i te manongi narido, okotai paunu, e mea apinga maata, kua akatainu ora i te vaevae o Jesu, e orei adura i tona rauru, ki akera te are i te aunga o taua manongi ra.

4 Kua na ko akera tetai pipi

nana ko Juda i Kariote a Simona, ko te pikikaa iaia ra.

5 Eaa teiane i manongi i kore ei i okoia i te denari kia toru ake te aneri, apai adu ei na te tangata rikiriki apinga kore ra?

6 I akapera adura aia, kare rā to te mea, e aroa aia i te tangata rikiriki ra, no te mea ra e keia aia, e nana e mou te bute, e nana rai e apai e te moni katoa i dukuia ki roto ra.

7 Kua karanga adurā Jesu, Vaio ua du ia, kua vaio aia i teia ei akatainu iaku, e ka tae adu ei ki te ra tanu manga iaku ra.

8 Ka noo rai oki te tangata rikiriki kio kotou nei, koau rā, kare au e noo tikai kio kotou.

9 ¶ Kua aere maira te ngati Juda e manganui i reira ra, kua kite ana e tei reira aia, kare ra no Jesu anake ra i aere mai ei, kia kite katoa ra ia Lazaro i tana i akatu mei te mate maira.

10 E tika rava akera ta te au taunga tuatua akatau e ka ta katoa ratou ia Lazaro.

11 No te mea nona i akaruke ei te ngati Juda katoa e manganui ia ratou, e akarongo adura ia Jesu.

12 ¶ E ao akera, manganui te tangata o taua aronga i aere mai ki te oroa ra, kite akera e te aere mairā Jesu ki Jerusalema.

13 Kua rave akera i te rara palama, aere adura kia aravei adu iaia, e kua kapiki adura. Osana! Kia ora na te Ariki no Iseraela, ko tei aere mai ma te ingoa o te Atu.

14 E kite akerā Jesu i tetai

punua asini, noo ora i rungao, koia oki tei tataia ra e,

15 “Eiaa e matakū e te tamaine a Siona; ka akara na, te aere maira toou Ariki, te noo ra ki runga i te punua asini.”

16 Kare te au pipi i kite i taua tuatua ra i muatangana, kia akameitakiia rā Jesu ra, kua manako akera ratou e, kua akaperaia taua tuatua nona nei i te tata, e kua akapera oki ratou iaia.

17 Kua akakite katoa adura oki te au tangata i vaitata iaia ra e, nana i kapiki ia Lazaro i tae mai ei ki vao mei roto mai i te menema ra, e kua akatu mai iaia mei te mate maira.

18 No te rongō o taua semeio tana i rave ra, i kononononi ua mai ei te tangata e aravei mai iaia ra.

19 Kua tuatua ora te au pharisea ratou ratou uaorai, Kare rai kotou i kite e kare ua a kotou i rauka e vai mea ngiti ake? e i na, kua ope takiri to te ao katoa, i te aru iaia.

20 ¶ E taua aronga i aere mai e akamori i te Atua i taua oroa ra, e Eleni ia tetai pae.

21 Kua aere mai ratou kia Philipa no Betesaida i Galilea ra, kua tuatua maira kiaia, E tama, te anoano nei matou kia kite matou ia Jesu.

22 Kua aere adurā Philipa akakite adura kia Anederea, kua tuatua maira oki a Anederea raua ma Philipa kia Jesu.

23 ¶ Kua tuatua adurā Jesu kia ratou, Kua tae ki te ora e akameitakiia i te Tamaidi a te Tangata nei.

24 Amene, amene, e karanga adu au kia kotou, Kia dukuia tetai ua sitona ki raro i te one, kia kore e mate ra, kua vai tai ua ia, kia mate ra, kua maata adura ia te ua anga.

25 Ko te anoano maata ua ki tona ora kua ngere ia i te ora, ko te kore e anoano i tona ora i teiane ai, ei ora mutu kore tona i tetai ao ra.

26 Ko te tangata e anoano ei tavini aia noku ra, ka aru mai ia iaku, e te ngai taku e noo ra, ei reira katoa taku tavini; e kia akatavini tetai tangata ei tavini aia noku ra, na toku Medua e omai tana utunga.

27 ¶ Kua ngareburebu rava toku vaerua i teiane ai, e ka akapeea ra au? (e na ko ainei) e taku Medua, ka akaora mai koe iaku i teiane ai ora; i aere mai ei ra au no teiane ai ora.

28 E taku Medua, ka akameitaki i toou ingoa. Kua kitea maira tetai reo no runga i te rangi, i te na ko anga mai, Kua akameitaki au, e ka akameitaki akaou adu rai au.

29 Kua kite oki te aronga tangata i reira i te aruru, manako akera, E mangungu: kua na ko akera tetai aronga, E agnela te tuatua maira kiaia.

30 Kua karanga adurā Jesu, Kare noku i tae mai ei taua reo nei, no kotou ra.

31 E teiane ai e akaapaia i teiane ai, ei teiane ai ka eke ei te ariki o teiane ai.

32 Kareka kia apaiia au ki runga ra, ka toia mai e au te tangata katoa kiaku nei.

33 I akapera adura aia i te akakite anga i te tu o tona matenga kia mate ra.

34 Kua tuatua maira te au tangata ra, I kite akenei matou i te ture ra, ka tika te Mesia i te ora anga mai; eaa oki koe i karanga mai ei e, ka apaiia te Tamaidi a te Tangata ki runga? Koai oki tauā Tamaidi a te Tangata ra?

35 Kua tuatua adura Jesu kia ratou, Koi roao te marama kio kotou nei, ka aere koi vai ake to kotou marama, ko te rokoia aea kotou e te poiri; ko tei aere ua i te poiri ra, kare ia e kite i tona aere nga.

36 Ka akarongo kotou i te marama, koi vai ake to kotou marama, kia riro kotou ei tamariki no te marama. E oti akera taua tuatua ra aere poiri adura aia, akaruke maira ia ratou.

37 ¶ Rave ua adu rai aia i te semeio e manganui ua du i mua i to ratou aroaro, kare akarai ratou i akarongo iaia.

38 Tubu adura te tuatua a Isaia peropheta ra, tana i karanga ra e, E te Atu, koai tei akarongo i ta matou tuatua? koai tei akakiteia i te rima o te Atu?

39 I kore ei i tika ia ratou kia akarongo, no te mea kua tuatua na a Isaia,

40 “Kua akapo aia i to ratou mata, kua tapakariia to ratou ngakau, ko te akara aea to ratou mata, ko te kite aea to ratou ngakau, ko te ariu mai aea, e ko te akaora adu au ia ratou.”

41 I pera mai a Isaia, i te

kite anga aia i tona inuina ka tuatua mai ei aia iaia ra.

42 ¶ Kua akarongo oki tetai papaki o te au akava ra iaia, no te matakau ra i te au pharisea ra i kore ei i mou akakite ua, ko te dukuia aea ki vao i te sinago.

43 E mea meitaki na ratou te akameitaki a te tangata i te akameitaki a te Atua ra.

44 ¶ Kua akateitei adura Jesu i tona reo, na ko adura, Ko tei akarongo mai iaku ra, kare ia koau tana e akarongo maira, i akarongo ra iaia i tei tono mai iaku nei.

45 Ko te akara mai iaku ra, kua akara aia i tei tono mai iaku nei ra.

46 I aere mai ei au i te ao nei ei turama, kia kore te akarongo mai iaku ra kia noo ua ki te poiri.

47 Kia akarongo mai te tangata i taku ra tuatua, e kare i akono i taua tuatua ra, kare ia koau te akaapa iaia, kare au i aere mai e akaapa mai i to te ao, i aere mai ra au e akaora i to te ao.

48 Ko te akavaavaa mai iaku ra, e kare i ariki mai i taku tuatua, te vai ra ia te akaapa iaia: na te tuatua taku i apii ra, e akaapa iaia kia tae ki te ra openga ra.

49 Kare oki i taku uaorai te tuatua taku i tuatua aduna; na te Medua ra i tono mai iaku nei i akaue mai iaku i te tuatua, kia tuatua adu au e kia apii au.

50 Kua kite oki au e, ko te ora mutu kore ia tana i akaue ra; e teiane i taku e tuatua

adu kia kotou nei, ko ta te Medua ia i akaue mai iaku, ko taku e tuatua nei.

PENE XIII.

No te orei anga a Jesu i te vaevae o te au pipi ra, e te tuatua a Jesu i te aroa taeake.

OU te oroa pasa ra, kua kite anā Jesu e kua tae ki tona ora, ka akaruke mai ei i teiane ao, ka aere adu ei ki te Medua ra, i aroa aia i tona tangata i te ao nei, aroa ua adura aia ia ratou e tae ua adura ki te openga ra.

2 E te kaikai ra ratou i taua kaingā kai i te po ra, (kua duku mai ana a Satani i te tuatua i te ngakau o Juda i Kariote a Simona ra, e pikikaa iaia.)

3 Kua kite ana a Jesu e, kua duku mai te Medua te au mea katoa tei tona rima, e mei ko mai aia i te Atua ra, e te oki adu rai oki aia ki te Atua ra.

4 Kua tu akera aia ki runga i taua kaingā kai ra, kopae adura i tona kakau, tatua ora iaia i tetai kakau orei.

5 Kua riringi ora te vai ki roto i te kabu, kua orei adura i te vaevae o te au pipi ra, e orei adura oki ki te kakau tatuaia e ia ra.

6 E tae adura aia kia Simona Petero ra, kua tuatua mairā Petero kiaia. E te Atua, ka orei mai rai koe i taku vaevae?

7 Kua tuatua adurā Jesu kiaia. Kare koe i kite i taku e

rave nei i tenana; ka kite ra koe a muri adu.

8 Kua tuatua mairā Petero kiaia, Auraka rava koe e orei i taku vaevae. Kua karanga adurā Jesu kiaia, Kia kore au e orei iakoe ra, kare rava aau buapinga ki aku nei.

9 Kua tuatau mairā Simona Petero kiaia, E te Atua, eiaa mari taku vaevae anake ua, ko toku rima katoa e toku upoko katoa oki.

10 Kua karanga adurā Jesu kiaia. Ko tei pai ra, otira ua ia, mari ra ko tona vaevae anake ra te orei, ko tona tino katoa ra kua ma ia; e kua ma oki kotou, kare ra i ope.

11 Kua kite oki aia i te tangata e pikikaa iaia ra, i tuatua adu ei aia e, Kare kotou i ope i te ma.

12 ¶ E oti akera tona orei anga i to ratou vaevae, e kua kakau ora aia i tona kakau, noo akaou ora aia ki raro i te kaingā kai ra, kua karanga adura kia ratou, Te kite na kotou i taku i rave nei ia kotou?

13 Te karanga nei oki kotou e koau te Oromedua, e te Atua; e tuatua tika oki ta kotou; koia tikai oki au nei.

14 E kua orei na oki au ko te Oromedua e te Atua, i to kotou vaevae, ka orei katoa oki kotou i to kotou uaorai vaevae e tika'i.

15 Kua duku adu na oki au i te akara nga na kotou, ko taku i raveo ia kotou nei, kia akapera katoa kotou.

16 Amene, amene, e karanga adu au kia kotou, Kare

te tavini i maata du i tona bu, e te Aposetolo kare ia i maata adu i tei tono mai iaia ra.

17 E ao to te aronga i kite i teiane i au tuatua, kia akono kotou i taua tuatua ra.

18 ¶ Kare to kotou katoa taku e tuatua nei, kua kite au i taku i iki, kia tubu te tuatua i tataia ra e tau ei, Ko tei kai i taku ra kainga kai, kua akateitei aia i tona poo vaevae iaku nei.

19 I akakite atea aduna au kia kotou i teiane i tuatua, kia akarongo kotou kia tubu ra e koau ia.

20 Amene, amene, e tuatua adu au kia kotou, Ko te kite mai i taku e tono ra, kua kite mai aia iaku ra, e te kite mai iaku ra, kua kite ia iaia i tei tono mai iaku nei.

21 Tei te tuatua anga a Jesu i teiane i au tuatua, tai-taia adura tona ngakau, kua karanga adura. Amene, amene, e karanga adu au kia kotou, Ka pikikaa tetai o kotou iaku nei.

22 Kua akara akera te au pipi ratou ratou uaorai mei te ekoko ua i taua tuatua ra.

23 Te irinaki ua ra te pipi akaperepere ki runga i tona umauma.

24 Kua tungou mairā Simona Petero iaia, kia ui adu aia i tana e karanga ra.

25 Kua karanga i tei irinaki ki runga i te umauma o Jesu ra ki aia, E te Atua, koai?

26 Kua tuatua mairā Jesu, Ko taku e apai adu i teiane i manga kai mea ngiti kia tutouia e au ra. E kia tutouia e

Jesu taua mangā kai mea ngiti ra, kua apai adura na Juda i Kariote a Simona ra.

27 E pou akera taua mangā kai mea ngiti ra, kua tomo mairā Satani ki roto iaia. Kua karanga adurā Jesu kiaia, Taau e ka rave, kia vave te rave nga.

28 Kare rava ra tetai i taua kainga kai ra i kite i te mea i tuatua adu ei aia kiaia ra i taua tuatua ra.

29 Te manako ra tetai papaki, no te mea tei ia Juda te bute, i karanga adu ei a Jesu iaia e, Ka oko i te apinga no taua oroa ra; e ka apai adu ainei i te apinga na te tangata rikiriki.

30 E tei te pou anga taua manga kai mea ngiti ra, aere adura aia ki vao i reira ra i te po.

31 ¶ E kia riro adu aia ra, kua tuatua adurā Jesu, Kua meitaki te Tamaidi a te Tangata i teiane i, e kua meitaki te Atua iaia.

32 Kua meitaki te Atua iaia ra, i akameitakiia mai aia e te Atua iaia uaorai i teiane i rai.

33 E aku au tamariki e, no te noo oki au kio kotou nei, e kimi kotou iaku; e taku i tuatua adu ki te ngati Juda ra e, Te ngai taku e ka aere nei kare kotou e tae ake ki reira, ko taku ia tuatua kia kotou i teiane i.

34 E duku adu au te tuatua ou kia kotou, E aroa kotou ia kotou uaorai, mei iaku i aroa ia kotou na, e aroa katoa oki kotou ia kotou uaorai.

35 Ko te mea teia e kite ei te

tangata katoa e e pipi kotou naku, kia aroa kotou ia kotou uaorai.

36 ¶ Kua tuatua mairā Simona Petero iaia, E te Atua, ka aere koe ki ea? Kua tuatua adurā Jesu kiaia, I teianeai vai taku e aere nei, kare e tika iakoe kia aru mai iaku i teianeai; ka aru mai koe iaku a muri adu.

37 Kua karanga mairā Petero, E te Atua, eaa e kore ei e tika kia aru adu iakoe i teianeai? e oronga oki au i toku ora noou.

38 Kua tuatua adurā Jesu kiaia, Ka oronga koe i toou ora noku e? Amene, amene, e karanga adu au kia koe, kare e kakaoa te moa ka tu toru adura oou uuna anga iaku.

PENE XIV.

To Jesu tamana anga i tana au pipi hoia te ngutupa, te tuatua i te Vaerua Meitaki e tonokia mai.

AURAKA e taitaia to kotou ngakau, ka akarongo i te Atua, ka akarongo katoa mai iaku.

2 Manganui te noo anga tikai i te are o taku Medua ra; naringa kare ra, kua karanga adu au kia kotou; te aere nei au e akamanea i tetai ngai no kotou.

3 E kua oti anake i te ako-noia e au ra, ka oki mai au e arataki ia kotou ki oku ra, ei reira katoa kotou i te ngai e nooia e au ra.

4 Kua kite kotou i teianeai

vai taku e ka aere nei, kua kite oki kotou i te mataara.

5 ¶ Kua tuatua maira a Toma kiaia, E te Atua, kare matou i kite i tenana vai taau e aere na, eaa oki matou e kite ei i te mataara?

6 Kua tuatua adurā Jesu kiaia, Koau te mataara, e te tuatua mou, e te ora; kare ua e tangata e tae ki te Medua ra mari ra ei iaku.

7 Angairi kotou i kite iaku ra, kua kite katoa kotou i taku Medua: e teianeai kua kite kotou iaia, e kua akara oki kotou iaia.

8 Kua tuatua maira a Philipa kiaia, E te Atua, ka akakite mai ia matou i te Medua ka oti du ei.

9 Kua karanga adurā Jesu kiaia, Ko toku nei oki noo anga roa kio kotou nei e, e kare akerai koe i kite iaku e Philipa? ko te akara mai iaku nei, kua akara ia i taku Medua; eaa oki koe i karanga mai ei e, Ka akakite mai ia matou i te Medua?

10 Kare koe i akarongo e tei roto au i te Medua, e tei roto te Medua iaku? E te tuatua taku e tuatua adu kia kotou nei, kare ia i taku uaorai; e te angaanga tini nei, na te Medua i noo ki roto iaku nei i rave.

11 Ka akarongo mai e tei roto au i te Medua, e tei roto te Medua iaku nei; kare ia, ka akarongo mai iaku i te au angaanga nei.

12 Amene, amene, karanga adu au kia kotou, ko te akarongo mai iaku ra, ka rave

katoa aia i teianei au angaanga taku e rave nei, e maata ua adu rai tana e rave i teia; no te mea te aere nei au ki taku Medua ra.

13 E ta kotou e pati ma toku ingoa ka tika ia iaku.

14 Ko ta kotou e pati ma toku ingoa, naku ia e rave, kia meitaki te Medua i te Tamaidi.

15 ¶ Kua anoano kotou iaku ra, ka akono i taku ra tuatua.

16 Naku oki e pati adu i te Medua ra, e nana e oronga mai tetai Akaako ia kotou kia noo tikai kio kotou nei e tuatau ua du.

17 Ko te Vaerua tuatua mou ra, ko tei kore e arikiia mai e to te ao nei, no te mea kare i akara iaia, kare oki i kite iaia; ka kite ra kotou iaia, e noo tikai oki aia kio kotou nei, e ei roto oki ia kotou.

18 Kare au e vaio Medua kore ua ia kotou, ka oki mairai au ia kotou nei.

19 E kia roaroa ake, kare ua to te ao e kite akaou mai iaku; ka akara maira kotou iaku; no te mea e ora au ka ora katoa oki kotou.

20 Kia tae ki te reira ra e kite ei kotou e, tei roto au i taku Medua, e tei roto oki kotou iaku ra, e tei roto oki au ia kotou.

21 Tei iaia taku tuatua, e kua akono aia i taua tuatua ra, koia te anoano mai iaku; e te anoano mai iaku ra, ka akaperepereia mai aia e taku Medua ra, e ka akaperepere oki

au iaia, e ka akakite oki au iaia iaku uaorai.

22 Kua tuatua mairā Juda kiaia, (kare Juda i Kariote,) E te Atu, eaa koe e akakite mai ei ia matou iakoe ra, e kare i to te ao?

23 Kua tuatua adura a Jesu kiaia, na ko adura, Kia anoano mai te tangata iaku ra, ka akono ia i taku tuatua; e ka akaperepere mai oki taku Medua iaia, e ka aere adu oki maua kiaia ra, ka noo tikai kiona ra.

24 Ko te kore i anoano mai iaku ra, kare ia i akono i taku tuatua: kare ra taku i teianei tuatua ta kotou i akarongo nei, na te Medua ra i tono mai iaku nei.

25 ¶ I akakite au kia kotou i teianei au tuatua, i toku noo anga kio kotou nei.

26 Na te Akaako ra, na te Vaerua Meitaki, ko ta te Medua e ka tono mai ma toku ingoa, nana e apii mai ia kotou i te au mea katoa; e ka akakite akaou mai oki kia kotou i te au tuatua katoa taku i karanga adu kia kotou na.

27 ¶ E au taku e vaio ia kotou nei, ko taku nei au taku e oadu no kotou; kare mei ta to te ao oronga taku oronga ia kotou, Eiaa e taitaia to kotou ngakau, auraka oki e mataku.

28 Kua kite kotou i taku i karanga adura e, Te aere ke nei au, e ka oki akaou mai au kia kotou nei. Angairi kotou i anoano mai iaku, kua reka-reka kotou koau e aere ki te Medua ra; e maata oki toku Medua iaku.

29 Kua akakite atea ua adu na au kia kotou i teiane i taua tuatua nei, kia akarongo kotou kia tubu ra.

30 Teia au ka kore e karangaranga maata adukiakotou i teiane i; te aere mai nei te ariki o teiane ao, kare rā ana ki roto iaku nei.

31 Te oronga nei ra au i toku ora kia kite to te ao e te anoano nei au i te Medua; e te akono nei au i tana i akaue mai iaku ra. Ka tu, ka aere ke tatou.

PENE XV.

Te tuatua i te vine e te au rara ra, te angaanga a te Vaerua Meitaki.

KOAU te vine mou, e ko taku Medua te tanu kai.

2 E te au rârâ ua kore katoa i roto iaku nei, nana ia e tibu ke adu; e te au rârâ ua katoa nana ia e tope kia meitaki, kia maata ua du te ua.

3 Kua ma ra kotou i tenana, i te tuatua taku i apii adu ia kotou.

4 Ka topiri mai ki aku, e naku e topiri adu kia kotou. Mei te rârâ e kore e ua koia anake ra, kia kore e piri ki te vine ra; kare katoa kotou. kia kore e piri mai kiaku ra.

5 Koau te vine, kotou te au rârâ. Ko te topiri ki aku ra, e ko te topiri adu au ki aia ra, koia te ua maata; i taka ké kotou iaku ra, kare rava e mea e tika ia kotou.

6 Ko te tangata e kore e topiri mai iaku ra, e akaru-keia ma te rârâ marō ra: ko

te akabutuia ei vaie ra, e tauia adura.

7 I topiri mai kotou ki aku ra, e kia noo marie taku tuatua ki roto ia kotou na, e pati ua kotou i ta kotou e anoano ra, e e orongaia mai ia kia kotou.

8 ¶ Ko te mea ia e meitaki ei taku Medua, kia maata to kotou ua anga, e riro kotou ei pipi naku i reira.

9 Mei taku Medua i akaperepere mai iaku nei, kua akaperepere katoa adu oki au ia kotou: kia noo kotou mei te akaperepereia adu e au.

10 I akono kotou i taku tuatua, e vai akaperepereia du kotou e au; mei iaku i akono i te tuatua a taku Medua ra, e e vai akaperepereia mai au e ia.

11 I tuatua adu au kia kotou i teiane au tuatua, kia vai rai toku mareka ia kotou, e kia tika katoa oki to kotou na rekareka.

12 Teia taku tuatua, kia aroa kotou ia kotou orai, mei iaku i aroa ia kotou.

13 Kia oronga te tangata i tona uaorai ora no tona au taunga, kare rava e tangata aroa maata adu i tei reira.

14 Kokotou toku taunga, kia akono kotou i te au tuatua katoa taku i tuatua adu ia kotou na.

15 E kore adura au e karanga kia kotou e e tavini; kare oki te tavini i kite i ta tona bu e rave ra; kua karanga rā au kia kotou e e taunga; kua akakite oki au kia kotou i te au tuatua ravarai taku i kite i taku Medua ra.

16 Kare oki kotou tei ano-ano mai iaku ; koau rā tei ano-ano ia kotou, e kua akono ia kotou, kia aere kotou e kia uua te ua, ei ua kai roa ; kia oronga mai te Medua kia kotou i ta kotou e pati adu ma toku nei ingoa.

17 ¶ Teia taku tuatua kia kotou, kia aroa kotou ia kotou uaorai.

18 Kia riri mai to te ao ia kotou ra, ka maara ana e koau ta ratou i mainaina mai ana, ou to ratou riri ia kotou.

19 Naringa kotou no teiane ai ao, e inangaro mai to teiane ai ao i tona tikai : no te mea ra kare kotou i to teiane ai ao, koau i iki ia kotou no roto i teiane ai ao, i riri mai ei teiane ai ao ia kotou.

20 Ka akamanako i taku i karanga du kia kotou na, Kare te tavini i maata i tona bu. I takinga kino ana ratou iaku ra, e takinga kino katoa ia ratou ia kotou ; i akono ana ratou i taku tuatua, e akono katoa ia ratou i ta kotou.

21 Noku nei rā e pera mai ei ratou kia kotou, no te mea kare ratou i kite iaia i tei tono mai iaku nei.

22 Naringa au kare i aere mai i tuatua adu ia ratou, kare ia a ratou ara ; i teiane ai kare o ratou kotoe anga i ta ratou ara.

23 Ko te kore e anoano mai iaku ra, kare katoa ia i anoano mai i taku Medua ra.

24 Naringa au kare i rave i rotobu ia ratou, i te angaanga rave koreia e te tangata katoa, kare ia a ratou ara ; i teiane ai rā kua kite ia ratou i te reira,

e kua riri mai rai iaku e taku Medua katoa oki.

25 Tika adura te tuatua i tataia ki roto i ta ratou ture ra e, I riri ua mai ratou iaku kare e ara.

26 Kia tae maira te Akaako no ko mai i te Medua ra naku e tono mai, ko te Vaerua tuatua mou no ko aia i te Medua ra, nana au e akakite.

27 E e akakite katoa oki kotou, no te mea tei toku ra pae katoa mei mutangana mai-ra.

PENE XVI.

To Jesu tamaana anga i te au pipi i te tuatua e ka omai te Vaerua Meitaki.

I TUATUA adu ei au kia kotou i teiane ai tuatua, kia kore kotou e maitu.

2 E duku ratou ia kotou ki vao i to ratou au sinago ra : e kua vaitata oki te ora e manako ei te tangata e ta ia kotou na, e kua akamori i te Atua.

3 E pera mai ratou ia kotou, no te mea kare ratou i kite i te Medua e iaku oki.

4 Te akakite adu nei au kia kotou i teia au tuatua, kia tae ki taua ora ra kia manako kotou e, kua tuatua adu au kia kotou i taua tuatua ra. Kare oki au i tuatua adu kia kotou i muatangana, no te mea tei vaitata ra au ia kotou.

5 E teiane ai te aere tika nei kiaia i tei tono mai iaku nei ra ; e kare akerai tetai o kotou i ui mai e, Ka aere koe ki ea?

6 No te tuatua rā i akakite ateaiā du e au kia kotou i tei-

anei, te ki ra to kotou ngakau i te aue.

7 ¶ E tuatua mou rà taku e karanga adu kia kotou nei, e meitaki ei kotou koau e aere ke nei; angairi au kare i aere ke, kare e riro mai te Akaako kia kotou nei; kia aere ke rà au, naku ia e tono mai iaia kia kotou nei.

8 Kia riro mairà aia, nana ia e akakite mai ki to te ao i te ara, e te tuatua tika, e te akaapa:

9 Ko te ara ra, ko ratou kare i akarongo mai iaku ra;

10 Ko te tuatua tika ra, koau e aere ki taku Medua ra, kare adura kotou e kite mai iaku;

11 Ko te akaapa ra, ko te ariki o teiane i ao i akaapaia ra.

12 E manganui rà taku tuatua e tuatua adu kia kotou, kare ra e tika ia kotou i teiane i.

13 Kia riro mai ra te Vaerua tuatua mou ra, nana ia e arataki ia kotou ki te au tuatua mou katoatoa; e kare oki tana tuatua e riro nana uaorai; ko tana rà e akarongo ra ko tana ia e tuatua mai, e nana oki e akakite mai kia kotou i te au mea e tubu a muri akera.

14 E akameitaki aia iaku; e rave oki aia i taku ra e, ka akakite adu ei kia kotou.

15 Ko te au mea katoa o te Medua ra naku ia; i tuatua adu ei au e, e rave aia i taku ra e ka akakite adu ei kia kotou.

16 Kia roaroa iti ake, kare adura kotou e akara mai iaku; e roaroa iti akera oki kua akara

mai kotou iaku; no te mea te aere tika nei au ki te Medua ra.

17 Kua karangaranga ora e toko-tai buke pipi kia ratou uaorai e, Eaa teia tana i tuatua mai kia tatou nei e, Kia roaroa iti ake kare adura kotou e kite iaku; e roaroa iti akera oki kua akara mai kotou iaku e no te mea te aere tika nei au i te Medua ra.

18 Eaa rà taua roaroa iti akera tana e tuatua nei? Kare tatou i kite i tana tuatua.

19 Te kite adurā Jesu e te inangaro ra ratou e ui mai kiaia, kua karanga adura aia kia ratou, Te ui ua na kotou uaorai i te tuatua taku i karanga adu na e, Kia roaroa iti ake kare adura kotou e akara mai iaku; e roa poto akera kua akara mai iaku?

20 Amene, amene, e karanga adu au kia kotou, E aue kotou, e e mii oki, ko to te ao ra, e kata ia; e mii kotou, kareka ra to kotou mii, ka akariroia ia ei rekareka.

21 E aue te vaine kia rokoia e te anau ra, no te mea kua tae ki tona ora. Kia anau ra te tamaidi, kare adura aia i manako i te mamae i te reka-reka, i te mea e tangata tei anau mai ki te ao nei.

22 Koia oki kotou ka aue i teiane i; e kite akaou mai rà au ia kotou, e e mareka to kotou ngakau, e e kore rava to kotou rekareka e riro ia etai kē.

23 E kia tae ki taua rà ra, kare kotou e ui mai ki aku. Amene, amene, e karanga adu

au kia kotou, ta kotou e pati adu i te Medua ma toku ingoa, nana ia e o mai kia kotou na.

24 Kare rai a kotou apinga i pati ma toku nei ingoa; ka pati, e rauka ia ia kotou, kia tika rava to kotou rekareka anga.

25 ¶ I tuatua parableia du kotou e au i teiane au tuatua; te waitata mai nei rā te ora e kore ei au e tuatua parable akaou adu ei kia kotou, e akakite ua adura kia kotou i te tuatua a te Medua ra.

26 Ei reira kotou e pati ake ei ma toku nei ingoa, e kare oki au i tuatua kia kotou e, naku e tuatua meitaki adu ki te Medua ia kotou.

27 Te anoano maira te Medua ia kotou, ko kotou i anoano mai iaku nei, e kua akarongo e, mei ko mai au i te Atua ra.

28 I aere mai nei au ki te ao nei mei mua mai i te aroaro o te Medua ra. Te akaruke nei au i teiane ao, e te oki akaou nei au ki te Medua ra.

29 Kua tuatua maira tana au pipi, I na kua tuatua papu ua mai koe i tenana, kare e parable.

30 Kua kite adura matou i teianci e, kua ope rava te au mea katoa i te kitea iakoe, auraka du rai tetai tangata e ui adu iakoe. Ko te mea teia i akarongo ei matou e mei ko mai koe i te Atua ra.

31 Kua tuatua adurā Jesu kia ratou, Kua akarongo ainei kotou i tenana?

32 I na, te waitata mai nei te ora, e teiane rai oki, e

pueurikiriki du ei kotou, ko te tangata ko tona kainga, akaruke maira iaku koau anake ua; kare ra koau anake ua, te waitata katoa ra oki te Medua iaku.

33 I tuatua adura au kia kotou i teiane au tuatua, kia rauka to kotou au iaku nei. E mate to kotou i teiane ao. Ka akamaroiroi ra, kua riro te re o teiane ao iaku.

PENE XVII.

No te bure a Jesu ki tona Medua ra, e tiaki i tana au pipi i te ao nei.

E KIA akaoti akerā Jesu i teiane tuatua anga, kua nānā akera ona mata ki runga i te rangi, na ko adura, E taku Medua, kua tae ki te ora; ka akameitaki i taau Tamaidi, kia akameitaki katoa oki taau Tamaidi iakoe.

2 Kua oronga mai oki koe i te mana nona ki te tangata katoa nei, kia oronga adu aia i te ora mutu kore i te aronga katoa taau i oronga mai nona ra.

3 Teia oki te ora mutu kore, kia kite ratou iakoe i te Atua mou, e ia Jesu i te Mesia i taau ra Aposetolo.

4 Kua akameitaki au iakoe i te ao nei; kua oti iaku te angaanga taau i omai naku e rave ra.

5 E teiane e taku Medua, ka akameitaki mai koe iaku i mua i toou aroaro na, i te meitaki noku iakoe ou ua teiane ao.

6 ¶ Kua akakite adu au i toou ingoa i te au tangata o teiane ao taau i omai noku ra,

noou ana oki ratou ; e naau oki ratou i omai noku ; e kua akono ratou i taau tuatua.

7 E te au mea katoa taau i omai kiaku, kua kite ia ratou i teiane i e no ko mai ana ia-koe na.

8 E naau i duku mai iaku te tuatua taku i duku ake kia ratou nei. E kua ariki ratou i taua tuatua ra, e kua kite tikai oki e, mei ko mai au iakoe ra, e naau au i tono mai.

9 Ko ratou taku e bure nei. Kare au i bure i to teiane i ao, ko te aronga ra taau i omai noku ra, noou oki ratou.

10 E toku katoa ra, noou ia ; e toou ra noku ia ; e kua meitaki oki au ia ratou.

11 Kua kore au e noo i teiane i ao ; ka noo tikai ra ratou i teiane i ao, e te aere du nei au kia koe na. E taku Medua tabu ra e, ka tiaki koe ia ratou i taau i omai noku i toou ingoa, kia okotai ake ratou mei ia taua katoa nei rai.

12 I toku noo anga i te ao nei ma ratou katoa ra, naku ia ratou i tiaki i toou ingoa na ; i taau i omai noku ra, kua tiakiia ia e au. E kare rava tetai i ngaro, mari ra ko te tamaidi o te mate ra, kia tubu te tuatua i tataia ra.

13 I teiane i ra, te aere adu nei au kia koe ra, e te tuatua nei au i teiane i tuatua ki te ao nei, kia tika rava to ratou umere anga iaku.

14 Kua duku adu au i taau tuatua kia ratou, e te riri nei to te ao nei ia ratou, no te mea kare ratou no teiane i ao, mei iaku nei rai oki kare i to teiane i ao.

15 Kare au i bure iakoe e ka apai kē adu koe ia ratou i teiane i ao, kia tiaki mai rā koe ia ratou auraka ei kino.

16 Kare ratou to teiane i ao, mei iaku nei rai oki kare to teiane i ao.

17 Ka akameitaki koe ia ratou i te tuatua mou ; ko te tuatua aau na te tuatua mou.

18 Mei iakoe i akariro iaku ei Aposetolo naau i teiane i ao, kua akariro oki au ia ratou ei aposetolo naku i teiane i ao.

19 E kua akataka au iaku uaorai no ratou, e kia akataka katoaia ratou e te tuatua mou.

20 ¶ Kare oki au i bure ia ratou anake ua, i te aronga katoa ra te ka akarongo mai iaku i ta ratou apii anga.

21 Kia riro ratou katoa ei okotai ; mei iakoe e taku Medua i roto iaku nei, e mei iaku oki i roto iakoe na, kia okotai katoa ratou ki roto ia taua, kia akarongo to te ao e naau au i tono mai.

22 E kua oronga au i te inu-inu no ratou i taau i omai noku ra, kia riro ratou ei okotai mai ia taua okotai nei ;

23 Ei roto au ia ratou, e ei roto koe iaku, kia tika to ratou kapiti anga, e kia kite to te ao nei e naau au i tono mai nei, e kua akaperepere mai koe ia ratou, mei iakoe e akaperepere mai iaku nei ra.

24 E taku Medua e, kua anoano au i te aronga taau i omai noku ra, ei waitata katoa o oki iaku i te ngai taku e noo ra, kia akara mai ratou i toku inu-inu i taau i omai noku ra, kua akaperepere mai ana

oki koe iaku ou te enua i angaia'i.

25 E taku Medua tuatua tika e, kare rai oki to te ao i kite iakoe, kua kite ra au iakoe; e kua kite oki ratou e naau au i tonu mai.

26 E kua akakite adu oki au kia ratou, e e akakite adu rai au i toou ingoa, koau oki i noo i roto ia ratou nei, kia akaperepereia mai ratou i toou akaperepere anga mai iaku nei ra.

PENE XVIII.

*To Juda pikikaa anga ia Jesu :
to Petero tibu anga i te taringa o te tavini ra, e to Jesu akava angaia.*

E OTI akera teiane tuatua i te karangaia e Jesu ra, aere adura aia e tana au pipi katoa na runga i te vai ra i Kiderona, e koro tei reira, tomo adura aia ki roto e tana au pipi katoa.

2 Kua kite katoa a Juda i pikikaa iaia ra i taua ngai ra, kua matau ua a Jesu i te aere i reira e tana au pipi katoa oki.

3 E tikiia adura e Juda te pupu vaeau e te ui taonga i te au taunga mamaata ra, e te au pharisea ra, kua aere maira ma te mori, e te rama, e te taongā rima katoa oki.

4 Kareka a Jesu, kua kite ia i te au mea katoatoa e rokoia mai ei aia ra, aere adura e karanga adura aia kia ratou, Koai ta kotou e kimi na?

5 Kua tuatua maira ratou ki aia, Ko Jesu i Nazareta ra. Karanga adurā Jesu, Koau nei

ia. Tei ia ratou katoa rā Juda i pikikaa iaia ra.

6 E tei te tuatua anga aia ia ratou ra e, "Koau nei ia," ko-toe kē adura ratou ki muri, inga tiraa ua adura ki raro i te one.

7 Kua ui akaou adura aia kia ratou, Koai ta kotou e kimi na? Kua karanga maira ratou, Ko Jesu i Nazareta ra.

8 Kua tuatua adurā Jesu, Kua tuatua adu au kia kotou e, koau nei ia. Te kimi nei kotou iaku ra, ka duku adu ia ratou nei kia aere ana.

9 Tika adura tana i tuatua ra e, Ko taau i omai noku ra, kare rava tetai no ratou i ngaro iaku ra.

10 E koke ta Simona Petero, e kua kiriti akera, ta adura i te tavini o te taunga maata, e motu takiri adura te taringa katau. Ko Malako te ingoa o taua tavini ra.

11 Kua tuatua adurā Jesu kia Petero, Ka momono ana taau koke ki roto i te vai. Auraka au e inu i te kabu ta taku Medua i omai naku ra?

12 Kua aru maira te pupu vaeau ra, e te kapena, e te ui rangatira o te ngati Juda ia Jesu, kua takai ora aia.

13 E kua arataki adura iaia kia Ana ra (no te mea e medua ongoai aia no Kaiapha, ko te taunga maata ia i te reira mataiti.)

14 Ko Kaiapha tei ako adu i te ngati Juda ra e, Kia mate adu tetai tangata e tika'i, eiaa te tangata katoatoa.

15 ¶ Kua aru adurā Simona Petero, e te tai pipi katoa ia Jesu, Kua kite oki te taunga

maata i taua pipi ra, e kua tomo adura ki roto i te are ko Jesu katoa oki.

16 Kareka a Petero tu ua maira ia ki vao i te ngutupa ra. Kua aere adura taua pipi i kite ia e te taunga maata ra ki vao, karanga adura ki te tamaine tiaki ngutupa ra, e kua duku maira ia Petero ki roto.

17 Kua tuatua maira taua tamaine tiaki ngutupa ra kia Petero, Kare aina koe tetai pipi a teiane tangata? Kua karanga adura aia, Kare au.

18 Te tu ua ra te au tavini e te aronga taoonga i te pae ai ta ratou i tau ra, no te anu, e te akamurumuru ra ratou. E te tu katoa ra a Petero i roto i te akamurumuru anga iaia ra.

19 ¶ Kua ui maira te taunga maata ra ia Jesu ki tana au pipi, e i tana tuatua e apii ra.

20 Kua karanga adurā Jesu kiaia, I tuatua akakite ua au ki te tangata katoa; ka tika rai au ki roto i te au sinago ra, e ki roto i te iero ra i te apii anga, i te ngai e akabutu ei te ngati Juda: kare rava au i tuatua ki te ngai ngaro.

21 Eaa koe i ui mai ei kiaku? Ka ui adu i te aronga i akarongo mai i taku i tuatua adu kia ratou ra. Kua kite oki ratou i taku i tuatua ra.

22 E kia akapera adura aia ra, kua moto maira iaia tetai o te aronga taoonga i tu ua i vaitatao iaia ra, kua karanga maira, E akapera koe i te tuatua ki te taunga maata?

23 Kua tuatua adurā Jesu, Te apa ra taku i tuatua akenei, ka akakite mai ana i te apa; e

tuatua tika ra, eaa ua koe e moto mai ei iaku?

24 E dukua takaiia adura aia e Ana ia Kaiapha i te taunga maata ra.

25 ¶ Te tu ua ra Simona Petero i te akamurumuru anga iaia ra, kua ui maira ratou kiaia, Kare ainei koe i tetai pipi nana nei?

26 Kua uuna adura aia, na ko adura, Kare au. Kua karanga maira tetai tavini no te taunga maata, no te kobu o te tangata nona te taringa i tibuia e Petero ra; Kare aina au i kite iakoe ki roto i te koro ra, ma ia katoa ra?

27 Kua uuna akaou orā Petero, kakaoa ora te moa i reira ra.

28 ¶ E kua arataki adura ratou ia Jesu i te akava anga, mei te are mai o Kaiapha ra; kua popongi; kare te ngati Juda i tomo ki roto i te akava anga, ko te ara aea ratou, Ko te kore oki ratou e kai i te pasa ra.

29 Kua aere mairā Pilato ki vao kia ratou ra, kua tuatua maira, I akaapa ana kotou i teiane tangata i te aa?

30 Kua tuatua maira ratou kiaia, Naringa aia kare te tangata ara ra, kare matou e duku adu iaia kia koe na.

31 Kua tuatua mairā Pilato, Ka rave mari kotou ka akava adu iaia i ta kotou ture. Kua tuatua adura te ngati Juda, E kore e tau i te ture kia ta matou i te tangata.

32 Tubu adura ta Jesu i tuatua ra, ko tana i akakite i te tu o tona mate.

33 ¶ Oki adurā Pilato ki roto i te akava anga, kua karanga adura kia Jesu, na ko adura kiaia, Ko te ariki ainei koe o te ngati Juda?

34 Kua tuatua mairā Jesu kiaia, Naau uaorai aina tena na tuatua, na tetai kē ainei i akapera ei koe iaku.

35 Kua tuatua adurā Pilato, No te ngati Juda ainei au? Na toou uaorai enua, e na te au taunga mamaata ra i duku mai koe kiaku nei. Eaa tikai koe?

36 Kua tuatua mairā Jesu, Kare to teiane ai ao taku basileia. Angairi no teiane ai ao taku basileia, kua akamaroiroi ia toku au tavini kia kore au e dukuia ki te rima o te ngati Juda; kare ra toku basileia i to konei.

37 Kua tuatua adurā Pilato, Ko te ariki mari koe? Kua karanga mairā Jesu, Te tuatua mai na koe e e ariki au. I anau mai ei au nei; i aere mai ei au ki te ao nei, e akakite i te tuatua mou. No te tuatua mou aia ra, ka akarongo mai ia iaku.

38 Kua ui adurā Pilato kiaia, Eaa te tuatua mou? E kia akapera aia ra, kua aere akaou maira aia ki vao ki te ngati Juda ra, kua tuatua maira kia ratou, Kare ua to taua tangata akera kino i kitea e au.

39 Ko te peu ra, ka duku au i tetai tangata kia kotou i te pasa ra, ka tika ainei ia kotou kia duku adu au kia kotou i te ariki o te ngati Juda?

40 Kua kapiki adura ratou ravarai, na ko adura. Auraka teiane ai tangata, ko Baraba ra. E aru taonga oki a Baraba.

PENE XIX.

To Jesu akaei angaia, e te papa angaia, e te akasatauro angaia, e te duku angaia ki roto i te menema ra.

KUA akaue adurā Pilato kia pāpā Jesu.

2 Kua akaei adura te au vaeau iaia i te rakau taratara ta ratou i atu ra; e kua akakakau adura oki iaia i te kakau muramura,

3 E kua karanga adura, Kia ora na te ariki o te ngati Juda, e kua moto adura oki i tona mata.

4 Kua aere akaou maira oki a Pilato ki vao, kua tuatua maira kia ratou, I na, i arataki mai nei au iaia kia kotou nei, kia kite kotou e, kare ua ona e kino i kitea e au.

5 Kua aere maira oki a Jesu ki vao ma te ei rakau taratara i te ei anga, e te kakau muramura i te kakau anga; e kua tuatua mairā Pilato kia ratou, Ka akara mai ana i taua tangata nei.

6 E kia akara adura te au taunga mamaata ma te aronga taoonga ra iaia, kua kapiki adura ratou, na ko adura, Ka akasatauro iaia, ka akasatauro adu. Kua tuatua maira Pilato kia ratou. Na kotou uaorai e rave e akasatauro adu iaia; kareka au, kare oki au i kite i tona kino.

7 Kua karanga adura te ngati Juda kiaia, E ture ta matou, e ka mate aia i taua ture ra, koia i karanga e, e Tamaidi aia na te Atua.

8 ¶ E kite akerā Pilato i taua tuatua ra, maata ua adura tona mataku.

9 Oki akaou adura aia ki roto i te akava anga, kua tuatua adurā Jesu, No ea a koe na? Kare rā Jesu i tuatua mai kiaia.

10 Kua karanga adura Pilato kiaia, Kare koe e tuatua mai kiaku? kare koe i kite e, tei iaku te akasatauro iakoe, e tei iaku oki te duku iakoe?

11 Kua tuatua mairā Jesu, Kare rava ouu e mana kia rave mai iaku naringa kare i orongaia mai toou mana no runga maira e teiane i ko tei duku adu iaku iakoe na, ko tana te ara maata.

12 Kua kimi tamou ua mairā Pilato kia dukuia aia; kua kapiki adura ra te ngati Juda, Kia duku koe i tenana tangata kare koe i to Kaisara: ko tei tuatua e koia uorai te ariki ra, kua akakino ia Kaisara.

13 E kite akerā Pilato i taua tuatua ra, kua arataki maira aia ia Jesu ki vao, e noo ora ki runga i te noo anga akava anga, i te ngai e karangaia ra e e patu, e Gabata i te tuatua Ebera ra.

14 (Ko te rā akamanea anga ia ko te sabati pasa ra, tei te ono o te ora ra.) Kua tuatua adura aia ki te ngati Juda ra, Ka akara mai ana i to kotou ariki.

15 Kua kapiki maira oki ratou, Ka akaruke adu i tena, ka akasatauro adu. Kua tuatua adurā Pilato kia ratou, Ka akasatauro adu ainei au i to kotou ariki? Kua karanga maira te

au taunga mamaata, Kare o matou ariki, mari ra ko Kaisara anake ra.

16 Kua duku adura aia kiaia kia ratou ra kia akasatauroia. Kua rave akera ratou ia Jesu arataki adura.

17 ¶ Aere adura aia mei tana satauro i te apai anga, e tae adura ki te ngai e karangaia ra e, e vairanga eibu katu, i te tuatua Ebera ra e Gologota ia.

18 I reira to ratou akasatauro anga iaia, e ko e tokorua puke tangata kē ra, okotai i te tai papaki, tetai oki i tetai papaki, i roto bu a Jesu.

19 Kua tataia ora e Pilato tetai akairo, kua duku adura ki runga i te satauro. Teia taua tuatua ra, **KO JESU TEIA I NAZARETA TE ARIKI O TE NGATI JUDA RA.**

20 Kua tataia ora te ngati Juda e manganui i taua akairo ra, (e te ngai i akasatauroia i a Jesu ra, tei vaitata ia i taua oire ra; i tataia taua akairo ra i te tuatua Ebera, e te Hela, e te Roma oki.

21 Kua tuatua adura te au taunga mamaata ra kia Pilato, Eiaa e tataia e, Ko te ariki o te ngati Juda, e na ko ra e, Kua karanga aia e koau te ariki o te ngati Juda.

22 Kua tuatua mairā Pilato, Ko tei tataia e au ra, kua tataia rai.

23 ¶ E kia patitiia aia ki te auri ki runga i te satauro e te au vaeau ra, kua rave ora i tona kakau ra, kua tua ora e ā tuanga, okotai vaeau okotai tuanga; kua rave ora oki ratou

i te kakau pu kare e tui anga, i raranga tapini rava ia.

24 Kua tuatua ora ratou ratou uorai. Auraka tatou e aea, ka akakelero ra kia kitea te atu; tubu adura te tuatua i tataia ra i reira, ko tei na ko ra e; "Kua tua ora ratou i toku kakau no ratou, e kua tua kelero oki ratou i toku kakau bu." I akapera adura te au vaeau ra.

25 ¶ E te tu ua ra oki tona medua vaine, e tona taeake ko Maria te vaine a Keleopa ra, e ko Maria no Magadala ra, i vaitata uorai i te satauro o Jesu ra.

26 E kia akara orā Jesu i tona medua vaine, e te pipi akaperepere nana ra, i te tu ua anga i reira ra, kua karanga ora aia i tona medua vaine, E maine ka akarā na i to tamaidi.

27 Kua tuatua ora aia ki taua pipi akaperepere ra, Ka akarā na i to medua vaine. E i reira ra aia te arataki angaia du e taua pipi ra i tona uorai ngutuare.

28 ¶ E muri akera kua kite oki a Jesu e kua ope te au mea katoatoa i te tubu; kua na ko akera, Kua kaki vai au, kia tubu te tuatua i tataia ra.

29 E te vai ra tetai ariki vinega i reira kua ki, kua ui ora ratou te rimu e ku akera, koia ora i te rârâ hisopa, topiriia adura ki tona vaa.

30 E kia inu akerā Jesu i taua vinega ra, kua tuatua mai-ra, Kua oti; kua takupe ora tona upoko ki raro, duku adura i tona vaerua.

31 ¶ Kua karanga adura te

ngati Juda kia Pilato kia aatiia to ratou vaevae, e kia apai keia to ratou tino, kia kore e vaioia te au kopapa ki runga i te satauro i te sabati ra, no te mea e râ akamanea anga (e sabati maata oki taua sabati ra).

32 Kua aere maira te au vaeau kua aati ora i te vaevae o tetai, e to tetai oki ko tei akasatauro katoaia ra.

33 Kia tae ra ratou kia Jesu ra, kite akera e kua mate aia, kare akera ratou i aati i tona vaevae.

34 Ko adura tetai vaeau i tona kaokao i te korare, tae ua maira te toto e te vai.

35 Kua kite tikai te mata o te tangata i tuatua i teianei au tuatua, ka tau oki te akarongo i tana tuatua, kia akarongo koutou; kua kite oki aia e tuatua mou tana e tuatua nei.

36 I tubu ei oki teianei au peu kia tika te tuatua i tataia ra e, Kare tetai ivi ona e aatiia.

37 E te na ko maira oki tetai manga tuatua i tataia ra e, E akara ratou i ta ratou i ko ra.

38 ¶ E muri akera i taua au tuatua nei, kua tuatua adurā Josepha no Arimatea ra kia Pilato, e rave aia te tino o Jesu e apai kē adu, e pipi oki aia na Jesu, i mou pōiri ua rà i te mataku i te ngati Juda ra: e tika akera ia Pilato: aere adura aia apai kē adura i te kopapa o Jesu.

39 E ko Nikodemo oki, ko tei aere mai kia Jesu i te po i muatangana, i aere mai aia ma te rakau i te apai anga mai, te mura te alo mea iroia, okotai aneri te pauna.

40 Kua rave adura ratou i te kopapa o Jesu, vai adura i te kakau ma te rakau kakara katoa ra, ko ta te ngati Juda ia ravenga kia miri ra.

41 E koro tei taua ngai i akasatauroia'i aia ra, e tei roto i taua koro ra tetai vairanga tangata, kare ua ra e tangata i vaioia ki roto.

42 Kua duku adura ratou ia Jesu i reira no te mea e rā akamana anga no te ngati Juda ra, tei vaitata ua ra taua vairanga tangata ra.

PENE XX.

To Maria ma aerenga mai ki te menema, to Jesu akakite anga iaia uaorai ki te au pipi, to Toma akarongo kore.

E TAE akera ki te rā mua o te ebedoma ra, kua aere adurā Maria i Magadala ra i te akirata i te tanu manga, te vai mareureu ua ra, e kite akera kua uri keia te toka i te ngu-tupa ra.

2 Oro ua maira aia kia Simona Petero ra, e te pipi akaperepere a Jesu ra, kua tuatua maira kia raua, Kua apai ke ia e ratou te Atu i te menema ra ki vao, e kare ua matou i kite i te vai i vaioia aia e ratou ra.

3 Aere adurā Petero i reira ra ki vao, e taua pipi katoa ra, e aere tika raua i te menema ra.

4 Kua ooro raua ravarai, e emo orā Petero i taua pipi ra, ko tei tae aduna ia ki te menema ra.

5 E piko ora aia ki raro, akara adura i te kakau vai i te

vai ua anga ; kare ra aia i tomo ki roto.

6 Kua aere mairā Simona Petero i muringao iaia ra, tomo adura ki roto i te menema ra, akara ora te kakau vai i te vai ua anga ;

7 E te kakau i te vai i tona upoko ra, kare ia i vaioia i te vairanga o te kakau vai ra, i kokopiia e vaio kēia ki te vairanga kē.

8 Kua tomo katoa adura tetai pipi, ko tei tae aduna ki te menema ra ki roto ; kite adura vai aia e akarongo adura.

9 Kare akera i ratou i kite i te tuatua i tataia ra e, ka tu akaou maira aia kia mate ra.

10 Oki akaou adura nga pipi i to ratou ra.

11 ¶ Karekā Maria te tu ua ra ia i te pae i vaitatao i te menema ra, te aue ua ra, piko ora aia ki raro ma te aue, e akara adura ki roto i te menema ra.

12 E kite adura aia i e tokorua buke angela ma te kakau teatea, i te noo anga ki te ngai i vaioia te kopapa o Jesu ra, i te upoko tetai e i te vae-vae tetai.

13 Kua tuatua maira raua kiaia, Eaa koe e aue ei e maine? Kua karanga adura aia, No toku Atu i apai kēia e ratou nei, e kare au i kite i te vaio angaia e ratou ra.

14 E kia akapera adura aia e oti akera, kua anga adura aia ki muri, e kite adura aia ia Jesu i te tu ua anga, kare aia i kite e, ko Jesu.

15 Kua tuatua mairā Jesu kiaia, E maine, eaa koe e aue

ei? koi taau e kimi na? maara akera aia e ko te tangata tanu kai ra, e kua na ko adura, E Tama naau aia i apai kê ra, ka akakite mai koe i te vaio angaia e koe na, e naku aia e tiki e apai kê.

16 Kua tuatua mairā Jesu kiaia E Maria. Kua ariu adura aia karanga adura, E Raboni, ko tei tuatuaia ra e, E te Oromedua.

17 Kua tuatua mairā Jesu kiaia, Auraka koe e tabu mai iaku; kare rai au i tae ki runga i toku Medua ra: e aere ra koe i toku au taeake ra, e karanga adu kia ratou e, Te aere nei au ki taku Medua ra, ki to kotou Medua ra, i toku Atua ki to kotou Atua ra.

18 Aere adurā Maria i Magadala ra, e kua akakite adura ki te au pipi ra e kua kite aia i te Atua, e nana aia i tuatua mai i taua tuatua ra.

19 ¶ E i te aiai o taua râ mua o te ebedoma ra, kua butubutu maira te au pipi, kua topiriia nga pa i te mataku i te ngati Juda ra, kua aere mairā Jesu i reira ra, tu ua ora ki rotobu, kua tuatua maira kia ratou, Kia ora na kotou

20 I akapera mai aia e kua akakite maira kia ratou i tona rima e tona kaokao. Mareka rava akera te au pipi i te kite anga i to ratou Atua ra.

21 Kua tuatua akaou mairā Jesu kia ratou, Kia ora kotou. Mei toku Medua oki i tono mai iaku nei, e tono katoa oki au ia kotou.

22 I akapera aia, e kua akabuangi maira te ao ki runga

ia ratou, e kua tuatua maira, Ka ariki mai na i te Vaerua Meitaki.

23 Na kotou e akakore i ta ratou ara ra, kua akakoreia ia; e na kotou oki e vaio i ta ratou ara ra, kua vaioia ia.

24 ¶ E tetai no te ngauru marua ra, ko Toma, ko te karangaia ia Didimo ra, kare aia i reira i te tae anga mai Jesu ra.

25 Kua tuatua adura te au pipi ra kiaia, Kua kite akenei matou i te Atua. Kua tuatua maira aia kia ratou, I kore au i kite i te tu auri i tona rima ra, e kia kore au i duku i toku rima i taua tu auri ra, e kia kore oki toku rima i duku i tona kaokao ra e kore au e akarongo.

26 ¶ E po varu akera, tei roto akaou akera te au pipi i te are, e ko Toma katoa oki, kua aere mairā Jesu, kua topiriia na nga pa, kua tu ua maira ki rotobu, kua tuatua maira, Kia ora na kotou.

27 Kua ariu maira kia Toma kua tuatua maira, Ka akatika mai ana i toou rima e ka akara mai ana i toku rima; e ka akatika mai ana i toou rima ka aa i toku kaokao, auraka e akarongo ngata, ka akarongo ra.

28 Kua tuatua adurā Toma kiaia, na ko adura, E tāku Atua, e tāku Atua.

29 Kua karanga mairā Jesu, No te mea te akara mai nei koe iaku nei e Toma i akarongo ei koe: e ao to te aronga kare i kite iaku ka akarongo mai ei.

30 ¶ E manganui adu rai te semeio a Jesu i rave i mua i te

aroaro o te au pipi ra, kare i tataia ki teiane i buka.

31 Ko teia ra tei tataia kia akarongo kotou e, ko Jesu te Mesia te Tamaidi a te Atua, e kia rauka oki to kotou ora i tona ingoa i te akarongo anga.

PENE XXI.

Te semeio i te ika ra, te ikuiku anga kia Petero e angai i tana mamoe, e tona matenga i akakiteia.

E MURI akera, kua akakite akaou mairā Jesu iaia uorai ki te au pipi i te roto i Tiberia ra, na ko aia i te akakite anga mai.

2 E te butubutu katoa rā Simona Petero ma, ma Toma ko te karangaia ia Didimo ra, e ko Nataneala i Kana i Galilea ra, e nga tamariki oki a Zebedaiō ra, e ko e tokorua oki buke pipi a Jesu ra.

3 Kua tuatua adurā Simona Petero ia ratou, Te aere nei au e tautai. Kua karanga maira ratou, Aere katoa tatou. Aere adura ratou i reira ra ki runga i te pai, kare ua a ratou mea ika i rauka i tei reira po.

4 E popongi akera, te tu ua rā Jesu i te pae roto ra; kare ra te au pipi i kite e ko Jesu.

5 Kua tuatua mairā Jesu kia ratou, E te au tamariki ra, e manga ta kotou? Kua karanga adura ratou. Kare ua.

6 Kua tuatua mairā Jesu kia ratou, Ka duku te kupenga ki te pae katau i te pai na, ka rauka ia ta kotou. Kua duku adura ratou, e kare ua adura i maranga ia ratou kia kika i te maata o te ika.

7 Kua tuatua adura taua pipi akaperepereia e Jesu ra ia Petero, Ko te Atua. Akarongo akerā Petero e ko te Atua tera, kakau ora i tona kakau i runga, (ko tei vaio kēia e ia ra,) tatua ora oki e rere adura ki raro i te tai.

8 Na runga maira tetai pae pipi i te boti, mei te kupenga e te ika i te kika anga mai, (kare i mamao ua ki uta ka tau te piti aneri i te kubiti.)

9 E tae maira ratou ki uta, akara adura i te ai te ka ra, e te ika ki runga e te areto oki.

10 Karanga adura Jesu kia ratou. Ka rave maina tetai aronga ika i ta kotou ika i rauka ra.

11 Aere adurā Simona Petero ki runga i te boti, kika maira te kupenga ki uta, kua ki te ika mamaata, okotai aneri e rima ngauru e matoru; kare ua ra i motu te kupenga i taua aronga ika mamaata ra.

12 ¶ Kua tuatua adurā Jesu, kia ratou. Ka aere mai ka kai. Kare ua ra tetai pipi i ui adu kiaia, Koai koe? i te matakū, kua kite oki ratou e ko te Atua ia.

13 Kua aere adurā Jesu, rave ora te areto, kua duku adura kia ratou ra e te ika katoa oki.

14 Ko te toru teia o to Jesu akakite anga mai iaia ki te au pipi ra, i muri ake i tona tu akaou anga mai.

15 ¶ E pangia akera ratou, kua tuatua adurā Jesu kia Simona Petero, E Simona a Jona e, te maata na toou anoano

kiaku ki teia? Kua tuatua maira aia, E te Atue, kua kite koe e, te anoano du nei au iakoe. Kua karanga adurā Jesu, Ka angai i taku au areneio.

16 Kua tuatua akaou adura kiaia, ko te turua ia o te tuatua anga, E Simona a Jona e te anoano ra koe iaku? Kua tuatua maira aia kiaia, E te Atue, kua kite koe e te anoano du nei au iakoe. Kua tuatua adurā Jesu, Ka angai i taku au mamoe.

17 Kua tuatua akaou adura aia kiaia, ko te toru ia o te tuatua anga, E Simona a Jona e, te anoano na koe iaku? Kua aue orā Petero i te mea ka tutoru akera ona ui anga mai kiaia, e kua tuatua maira, E te Atue, kare ua e mea toe i te kitea e koe, kua kite koe e, te anoano du nei au iakoe. Kua tuatua adura Jesu, Ka angai i taku au mamoe.

18 Amene, amene, e karanga adu au kia koe, I toou mea ou anga, kua tatua koe iakoe uaorai, e kua aaere ora koe ki taau ngai e anoano ra; e kia ruaine koe, na tetai kē e kika i to rima, e e takai iakoe, e apai du ei iakoe i te ngai anoano koreia e koe ra.

19 Akapera adura aia i te akakite anga kiaia, i te tu o tona mate e meitaki ei te Atua.

E oti akera taua tuatua ra, kua karanga adura aia kiaia ra, Ka aru mai iaku.

20 ¶ Kua ariu mairā Petero ki muri, kite maira i taua pipi akaperepere na Jesu i te aru anga mai, (ko tei irinaki ki runga i tona umauma i te kainingā kai ra, ko tei tuatua ra, E te Atue, koai te tangata e pikikaa iakoe?)

21 Kua akara mairā Petero iaia, e kua tuatua adura ia Jesu, E te Atue, ka aaia teianeitangata?

22 Kua tuatua mairā Jesu kiaia, Kia anoano au i te vaio iaia e kia riro mai au ra, eaa taau i reira? Ka aru mai koe iaku.

23 Maata adura taua tuatua ra i te au taeake ra e, kare taua pipi ra e mate: kare ra Jesu i karanga e, e kare e mate: i na ko ra e, Kia anoano au i te vaio iaia e kia riro mai au ra, eaa taau i reira?

24 ¶ Teia taua pipi ra e karanga adu i teianeitauatua, e kua tata oki taua au tuatua nei: e kua kite oki matou e e tuatua mou tana.

25 E manganui adu rai ta Jesu peu i rave, naringa i ope katoa i te tataia, te maara nei au kare e tika i to te ao katoa nei kia ariki mai i taua au buka ra naringa i tataia. Amene.